

Nyuuth tēnē Joon

Wēt nom

Athör kēnē anyuth tēnē Joon cī gōt wäär guum kōc cī gam, rin cī kek la gam tēnē Jethu Krītho ke ye Bēny. Wētdit wīc raan gāt athōōr, ee wēt būi kōc bī ye kueen riēel puōth bīk la nōth, bīk rēer ke nōth akōōl kāreç ke gum.

Abañdīt athör kēnē yic atō kājuēc wat kekōōth kāk cī nyuōōth, ku kāk cī tīñ cī ke kiēt wēl yiic, kāk ye kōc thēer wäär cī gam ke deet yiic. Ku alēukē bīk rēer ke cī moony tēnē kōc kōk ēbēn. Athör kēnē acī guir ke cīt dhōl waak, yen aye ke wēl lueel ku ben ke ber yiic dhāl juāac cī thōñ, cīt tē cī ke wat kōōth thīn.

Na cōk alōn cī tāk ye rōm kek tēcīt tē ye ke deet yiic thīn athōōr yic. Ke wēt ciel yic ala gēi, dhēl Krītho Bānyda, yen Nhialic. Abī kōc aterde tiaam alanden akōl ciēēn agut Bēny jakreç. Akōl le tiām kēnē thāap, ke kōc cī gam aabī dōoc. Ku riōp ke piny ē yam, nhial ē yam.

Kāk tō thīn

Wēt Nom 1:1-8

Jōk ē nyuuth ku athör cī gāt akuut kōc kadhorou

1:9-3:22

Athōōr kek adōk kadhorou 4:1-8:1

Kēñ kadhorou 8:2-11:19

Jōñrac ku lāāi karou 12:1-13:18

Anyuth kōk juēc 14:1-15:8

Riāak puōu ē Nhialic 16:1-21

Riāñ Babilon ku tiām cī kōc ater Nhialic tiaam

17:1-20:10

Lunđit 20:11-15

Nhial ku piny ku Jeruthalem ë yam 21:1–22:5

Thök ë Wël 22:6-21

Wël tueŋ

¹ A athör kēnē yic Joon aci kǎŋ gät piny, kāk cī Jethu Krītho nyuəəth. Acī Nhialic looi bī kākā tīŋ, rin bī kacke cəl aŋic kāk bī röt looi nīn thiökkā yiic. Raan cī lɔc ku dɔc acā atunyden nhial tuəc aluənyde bī lək athön kēnē.

² Joon aci kāk cī tīŋ ëbēn luεεl. Yeen acā athön bō tēnē Nhialic gät piny, ku kāk cī Jethu Krītho nyuəəth ye.

³ Raan mit puəu ë raan bā athön kēnē kuēn kɔc cī gam, athön bō tēnē Nhialic. Ku kɔc mit puəth, aa kɔc bī ye piŋ ku thekkē kē ye lueel, rin tē bī Nhialic kākā cəl aloi röt aci thišk.

Muəth tēnē akuut kɔc cī gam kadhorou

⁴ Ee ɣen Joon, ɣen agēt tēnē akuut kɔc cī gam ë bēēi Athia yiic.

ɣen aröök lɔn bī wek nhiēr ku döör yök tēnē Nhialic. Yen tō thīn ëmēn, ku arēēr thīn tēthεεryɔn, ku yen bī bēn. Wek aabī nhiēr ku döör yök tēnē wēi kadhorou ë thöny Nhialic nhom,

⁵ ku tēnē Jethu Krītho, raan yen nyooth yic rin Nhialic. Yen ë ye raan tueŋ cī rot jɔt ë thou yic, ee yen amac bānyŋaknhīim ëbēn pinynhom aya.

Yeen anhiar ɣo, ku ajuērden cī yen rot juaar bī thou, ëcī yen ɣo wēēr bei adumuöömkuua yiic,

⁶ ku looi ɣo buk aa kɔc luui Nhialicde ku ye Wun, diik ku riel aa kākke akölriëc ëbēn. Yenakan.

⁷ Tiēŋkē, yen abō pial yiic. Abī raan ēbēn tīŋ, agut kōc wäär nāk ye. Kōc pinyinhom ēbēn aabī dhiau ē rienke. Kēya abī ciēt kēnē! Yenakan.

⁸ Aye Bēny Nhialic lueel ēlā, “Ee ŷen jōk ē cōk ku ŷen thōk ē kāŋ.” Nhialic Madhəl tō thīn ēmēn, ku arēēr tēthēryōn, ku yen bī bēn.

Tīŋ Raan cī lōc ku dōc

⁹ Ee ŷen Joon menhkui dun, week ēbēn wek kōc tuōc athōr kēnē, ke ŷa ye raan cī wēt Jethu gam cīmēndun. Ku rin ē kēnē ŷok aa tōk, ku ŷen agum aya cīmēndun. Ku ŷen abī rēēr ē bāāny Nhialic yic kek we aya, ku ŷen alir puōu cīmēndun. ŷen a ŷa mac golgol Patmoth nhom, golgol rēēr Adēkdīēet yic, rin cī ŷen wēt Nhialic, ku yiny Jethu nyuōōth.

¹⁰ Wēi Nhialic aake cī bēn ŷaguōp akōl Nhialic. Guō rōldīt la wic cīt kaŋ piŋ ke jam ŷakōu ciēēn.

¹¹ Ku lueel, “Gāt kē ye tīŋ athōōr yic ēbēn, ku tuōc athōōr tēnē akuut kōc cī gam ē bēēi kadhorou yiic, Epethuth, Thimirna, Pergamum, Thiatira Thardīth, Piladelpia ku Lodikia.”

¹² Guō rot wel ba raan jam tīŋ, nawēn wel ŷanhom, ke ŷa tīŋ kāk ye many adōk took kenhūim cī looi mīlāŋ tōc kadhorou, ke kääc.

¹³ Ku kēcīt manh raan ke kääc keciēl yiic, ku a cienj alanh dīit ye paat kōc kōōth ē piny kuaar ŷet yecōk, kek karkar dīit cī looi mīlāŋ tōc yepēem.

¹⁴ Nhīmken ē nhom aake ŷer ka cīt gai tueny deŋ, ku adēp nyin cīmēn mac.

1:7 Dan 7:13; Mt 24:30; Mk 13:26; Lk 21:27; 1The 4:17; Dhāk 12:10; Jn 19:34, 37 **1:8** Ny 22:13; B.bei 3:14 **1:13** Dan 7:13; 10:5 **1:14** Dan 7:9; 10:6

¹⁵ Ku cök ala diardiar cīt ban cī coth kōu, ku akök yic apēi cīt lōör puɔc kōɔc.

¹⁶ Yen wēn amuk kuēl kadhorou ciinden cuēc, ku amuk pal dīit moth ē thok kedhie bō bei yethok. Ku dēp nyin cīt ruēl akōl ciēl yic.

¹⁷ Wēn tīŋ ɣen ye, ke ɣa wiēäk piny yecök ciēt ɣa cī thou. Go ɣa thany nhom ciinden cuēc ku lueel, “Duk riēc. Ee ɣen jāk ē cök ku ɣen thök ē kǎŋ.

¹⁸ ɣen ē pīr, ɣen a ɣa cī thou ku emēn ɣen aci bēn pīr akōlriēc ēbēn. ɣen amuk wēnh riēt yōöt ē thou ku yōöt pīr aya.

¹⁹ “Yīn adhīl kākā gōt ēbēn, kāk ye tīŋ emēn ku kāk bī rōt looi akōldā.

²⁰ Ku kuēl kadhorou, ca tīŋ kōŋdiēn cuēc, wētden yic, atuuc nhial kadhorou, tēnē akuut kɔc cī gam kadhorou. Ku kāk kāac kāk ye many adök took kenhīm akuut kɔc cī gam kadhorou.”

2

Athōn tēnē kɔc cī gam Epethuth

¹ “Yīn awiēc ba athōör gāt akut kɔc cī gam gen Epethuth, raan muk kuēl kadhorou ciinden cuēc ku cieth kam kǎŋ kadhorou ye many adök took kenhīm, aye lueel tēnē we ēlä.

² Anjēc yen tē cī wek pīr thīn ē piērdun yic. Anjēc yen tēril cī wek luui thīn ke we kɔc cī gam, ku tē cī wek kārīl yiic gōök thīn. Anjēc lōn cīi wek ye bī lēu bāk kɔc ē luui käreɔc puōl bīk ke ya looi welēm. Wek aaci kɔc ye lueel lōn ye kek atuuc Jethu them, ku acāk bēn yök lōn ye kek alueth ē path.

³ Anjɛc lɔn guum wek riɛnkiɛ we lir puõth, ku wek kɛc puõth bath.

⁴ Ku kē maan tēnē we akīn, wek aciī ɣɛn nhiar ɛmɛn cimɛn thɛɛr wäär puɔc wek gam.

⁵ Kēya, muõkkē wenhīim yen tē cāk dōöt luɔi kārɛc yiic! Pälkē luɔi kārɛc, ku piɛrkē cīt tɛthɛɛr wäär puɔc wek wɛt ca lɛk we gam. Na lak tuɛŋ ke we lui kārɛc, ke ɣɛn abī la tēnē we, ku la we tɛm awuɔc bī ɣɛn kɛdun ye wek many adök took yenhom nyaai tɛden kɛɛc yen thīn.

⁶ Ku wek ya leec rin mɛɛn wek kāk ye kɔc Nikolauth looi cimɛn mɛɛn ɣɛn ke aya.

⁷ “Na lakkē yīth, ke we piŋ kē ye Wēi Nhialic lɛk akuut kɔc cī gam. ɣɛn abī kɔc cī jɔŋrac tiaam gām yic bīk mīth tim ɛ pīr cam, tim rɛɛr gör ɛ Nhialic yic!

Athön tēnē kɔc cī gam Thimirna

⁸ “Yīn awiɛc ba athöör gät tēnē akut kɔc cī gam gen Thimirna ɛlä, kēnē ɛ wɛt raan kǎŋ cɔl ajök röt ku cɔl ke aa thök, raan cī thou ku ben pīr aya, aye lueel,

⁹ ɣɛn anjic kārīl rɛɛr wek thīn, anjɛc lɔn wek aa ŋŋ ku wek ajiɛɛk wɛpuõth. ɣɛn anjic kārɛc ye lueel wegup kɔc ye lueel ka kɔc cī Nhialic lɔc, ku ɛ lueth ɛ path. Ku keek aa kɔc akut jɔŋrac.

¹⁰ Duõkkē riõc gum bī wek gum ɛmɛn. Piɛŋkē! Jɔŋrac aci thīök kek tē bī yen kɔc kök kamkun mac rin bī yen gamdun them. Wek abī rɛɛr ater yic nīn kathiäär ku duõkkē puõth go bath wɛtdiɛ yic cɔk

alɔn nək we, rin wek aaba gām pīr akōlriēec ēbēn ke ye yen ariöp.

¹¹ “Na lakkē yīth, ke we piŋ kē ye Wēi Nhialic lək akuut kəc cī gam. Ku raan bī jəŋrac tiaam, acīn kērεεc bī ye yök alanayɔn ē thon yic rou.

Athön tēnē kəc cī gam Pergamum

¹² “Yīn awiēc bā athöör gät tēnē akut kəc cī gam gen Pergamum, kēnē athön bō tēnē raan muk pal cī ther thok kedhie.

¹³ Yēn anic tē rēer wek thīn gen mεc jəŋrac. Wek aa kəc wētidiē ē cök, ku wek akēc puōth dhör gamdun yic tēnē ya. Wek akēc gamdun waar yic, agut wäär cək Antipāth raan ye nyuōth kāk ye looi yiic lɔn ee yen raandiē nək gendun ē tēēn, gen mεc jəŋrac.

¹⁴ Ku ala kāthii maan tēnē we, kəc kək weyiic aa piöoc Balaam buōth yic, Balaam wäär nyuth Balak tē bī yen kəc Itharel cəl aloi adumuōm thīn. Ku lēu bīk rīŋ cuet, rīŋ lān cī nāk jak, ku loikē kāk bal.

¹⁵ Ku kēlä aya, kəc kək weyiic aa piöoc kəc Nikolauth buōth yic.

¹⁶ Pälkē luoi käreεc! Na cäk päl ke yēn abī bēn kek ē pal bēn bei yathok bī yēn kəc kāk tēm awuōc.

¹⁷ Na lakkē yīth, ke we piŋ kē ye Wēi Nhialic lək akuut kəc cī gam. Yēn abī raan cī jəŋrac tiaam gām aban ayum nhial cī Nhialic tōōu, ku gām alel yer, alel cī rin yam cīn raan ŋic ke göt yekōu, na cie raan cī gām ye.

Athön tēnē kəc cī gam Thiatira

2:11 Ny 20:14; 21:8 **2:14** Kn 22:5, 7; 31:16; L.rou 23:4; Kn 25:1-3

2:17 B.bei 16:14-15; 16:33-34; Jn 6:48-50; Ith 62:2; 65:15

18 “Yin awiēc ba athöör gät akut kɔc cī gam gen Thiatira elä, kakkä aa wël bö tēnē Wēn Nhialic raan nyin dēp cīt mac, ku le cök diardiar cīt ban cī coth kōu.

19 Yēn aɲic kāk yakē ke looi. Aɲic lɔn wek aanhiar röt kamkun, ku wek aa muk gamdun. Aɲic yen tē cī wek röt kuony thīn kamkun, ku tē guum wek thīn, aɲic lɔn wek aaloi kajuēc wār kāk wäär tuen.

20 Ku yēn ala kēthiin maan tēnē we, wek aaci tik puəl tin cəl Jedhebel ye lueel ke raan kāk Nhialic tū. Ku piöcde ē kackiē thēl luoi kāk bal yiic, ku camkē miēth cī juēr jak cī kiēt.

21 Aca lēk bi yepuōu dhuök ciēn adumuöömke yiic, ku aci jai bi yepuōu dhuök ciēn.

22 Ku kēya, aba cəl atuany ku kɔc kāk bal looi kek ye aabi gum apēi tē cī kek kepuōth dhuk ciēn, ku pälkē käreec yekē ke looi kek ye.

23 Kɔc cī piöcde gam aa ba nök, ku aabi akuut kɔc cī gam ebēn jal ɲic lɔn yēn ē raan ē kē tō raan puōu ebēn ɲic, ku ɲic kuat kē wic. Ku kuat raan ebēn aba tēm awuōc cīt kē cī looi.

24 “Ku emēn aba lēk kɔc abēk kamkun gen Thiatira, kɔc kēc piöc rēc ē tin buōth yic, ku wek aakēc luui kē ye kacke cəl, ‘Aye kē cī thiaan apēi cī jɔɲrac moony.’ Aya lēk we lɔn wek acā bi mäs dēt ril yic.

25 Wek aadhil la tuen ke we gam wētidiē, yet tē bi yēn bēn.

26 Yēn abi kɔc cī jɔɲrac tiaam, ku lek tuen ke loi wētidiē yet tē bi yēn dhuk gām riel bik pinyhom

mac.

²⁷ Aabi pinynhom mac riel ke cīn aṇuān, ku abik thuōr piny ku thorkē ke cīmēn tōny cī looi ē tiōp.

²⁸ Riēlden abī thōṅ kek riel ca yōk tēnē Wā. Aaba gām ciēer aya, ciēer bī ke nyuōth tiām cī kek tiam.

²⁹ Na lakkē yīth, ke we piṅ kē cī Wēi Nhialic lēk akuut kōc cī gam.

3

Athōn tēnē kōc cī gam gen Thardīth

¹ “Yīn awiēc ba athōor gāt tēnē akut kōc cī gam gen Thardīth ēlā, raan mac wēi kadhorou thōny Nhialic nhom, ku amuk kuēl kadhorou, ee we tuōc wēt kēnē,

Yēn aṅic kuat kāk cāk looi ēbēn, aṅiēc lōn ye wek ye tak lōn piīr wek cōk alōn cī wek thou.

² Aca yōk lōn piērdun ke we ye kōc cī gam aciī thōṅ kek tē cī Nhialic ye guēer thīn. Kēya, pāäckē nīn yic, ku dhuōkkē riel yam ē pīr kōc cī gam yic ke we kēc guō thou ē gīm.

³ Muōkkē yīth wāār cī piōōc tēnē we nhīim, ku thekkē ke. Pālkē luōi kārēc ku dhuōkkē wepuōth ciēēn adumuōōmkun yiic. Pāäckē ba rot cīi kuēl wegup ciēt ya ye cuār ē bēn baai wakōu. Ku aciī bī ṅic ba bēn nēn.

⁴ Ku na cōk a kēya ke wek aṅot we la kōc lik Thardīth, kōc kēc luui kārēc. Keek aabi cath kek ya ke ciēṅ alēth yer, rin aala yic bik looi kēya.

⁵ Raan bī riel jəŋrac tiaam cīmēn ē kek abā alēth yer cien. Ku rienke acā bī nyaai athör pīr yic. Tē le yēn kōōc Wā nhom kek atuucken nhial ye luōōi, aba lueel yenhom lən ŋic yēn ē raan kēnē.

⁶ Na lakkē yīth, ke we piŋ kē ye Wēi Nhialic lēk akuut kōc cī gam.

Athön tēnē kōc cī gam gen Piladelpia

⁷ “Yīn awiēc ba athöör gät tēnē akut kōc cī gam gen Piladelpia ēlä, raan la guōp Wēi Nhialic ku yic, yen la riel bī kōc Nhialic mac nyin bēnyŋaknhom Debit. Ku tē ŋeeny yen yōt thok ka cīn raan lēu ye bī thiōök. Ku tē thiōök yen yōt thok ka cīn raan lēu ye bī ŋaany.

⁸ Yēn aŋic kāk yakē ke looi, aŋiēc lən le wek riel koor, ku wek aa ŋot we buath piōōcdiē yic ku thekkē ya. Tiēŋkē yōt aca ŋaany thok wenhīm, ku acīn raan lēu ye bī ben thiōök thok.

⁹ Tiēŋkē, yēn abī kōc kek kōc jəŋrac, alueth ye lueel lən ye kek kōc cī Nhialic lōc looi bīk tō wecōk, ku bīk deet yic lən nhiēer yēn we.

¹⁰ Wek acī gum riel ē thok cīt tēwäär cī yēn we lēk thīn. Kēya, wek aba kony aya tē le nīn thōk, nīn bī yēn kōc pīr ēbēn them pinynhom.

¹¹ Yēn abō ēmēn, muōkkē kē cāk yōk apath, bī ciēn raan rum kēpeth cāk yōk rin cī wek tiam.

¹² Raan bī riel jəŋrac göök aba looi ke ye thel ril yōn ye Nhialic door thīn, Nhialic yen ya luōōi. Raan kēnē acīi bī kaŋ jāl ē tēēn. Aba gät kōu rin Nhialicdiē ku rin Jeruthalem yam, yen rin gen ē

Nhialicdiē bī bēn bei tēnē Nhialic nhial. Aba gāt kōu aya rinkiēn yam.

¹³ “Na lakkē yīth, ke we piŋ kē ye Wēi Nhialic lēk akuut kōc cī gam.

Athōn tēnē kōc cī gam gen Lodikia

¹⁴ “Yīn awiēc ba athōōr gāt tēnē akut kōc cī gam gen Lodikia ēlā, raan yen Yenakan. Yen cī yiny Nhialic nyuōth ē cōk, ku ē yen aci kēriēc ēbēn cī Nhialic jōak cōk cak, aye lueel ēlā,

¹⁵ Yēn aŋic kāk cāk looi ēbēn, wek aa kēc yēn jai, tēdē wek aa kēc yēn lor piāthkun ēbēn, na we ye rōt mat abak, diēt apath yapuōu.

¹⁶ Ku rin kēc piāthkun rōt mat abak, yēn abī jai ē we.

¹⁷ Yīin aye lueel, ‘Yēn ajak! Acīn kē ŋōŋ ya, acīn kē bēn wīc.’ Ku aciī ŋic yen tē ye yīn laaŋ aŋāāŋ thīn. Yīn aŋaŋ ē cath ke cīn kē ceŋ, ku yīn ē cōr.

¹⁸ Rin ē kēnē, yīn alēk bī ya mīlāŋ tōc la wic yen yōc tēnē ya, bī yīn jīēk yōk thīn. Yīn adhīl alēth yer yōc aya ba ke tāāu yīkōu, ku bī kēwāār yīn cath yīkōu path ke cīn alanh cieŋ liu ba guōp cīī ben riōc ē kōc, ku yōc kē ye kōc kenyīn tōc ba tāāu yīnyin rin bī yīn daai.

¹⁹ Kōc nhiaar aa ya māt ku tēm ke awuōc, kēya rēērke apath ku pālke luōi kārēc bāk puōth miēt.

²⁰ Pālke weyīth piny, yēn ē yārōl tuŋ yōndun thok. Na le raan piŋ yārōl ku ŋēny yōt thok ke yēn ala thīn, ku laar ku määth kek ye.

²¹ Yēn abī raan cī riēl jōŋrac göök gām yic bī nyuc ē thōōc nhom yalōm. Kēnē abī ciēt ēmēn cī

ɣen riel jəŋrac göök ku nyuöök ë thöök nhom Wä lööm.

²² “Na lakkē yīth, ke we piŋ kē ye Wēi Nhialic lēk akuut kəc cī gam.”

4

Thöny pan Nhialic

¹ Tēwēn cī ɣen kākā äbēn tiŋ, ke ɣa ben nyuöth aya, ku tiŋ yöt thok ke ŋaany pan Nhialic. Ku kē ca piŋ tueŋ ë raan jam tēnē ɣa röldīt la wic cīt kaŋ ke ye lueel, “Bäär nhial tēn ku yīn aba cəl atīŋ kāk bī röt looi ye kēnē cök.”

² Nyin yic ë tēn ke Wēi Nhialic la ɣaguöp. Ku tiŋ thöök ë tēn pan Nhialic ku raan ke cī nyuc yenhom.

³ Raan cī nyuc ë thöök adēp nyin bilbil cīt kuur ɣer dhēŋ, ku kēdīt cīt mīt ke cī thöök gööl piny, ke dēp birbir.

⁴ Ku aləŋthīn kēwēn cī thöök gööl piny yic, thök kök kathiārou ku ŋuan aake kääc thīn, ku kəcdīt kathiārou ku ŋuan aake cī nyuc kenhīm. Ku keek aake cieŋ alēth ɣer ku ajəm ë bāny kenhīm.

⁵ Thöök abier ku mēer nhial cīet ye deŋ. Thöök nhom tueŋ mēc adök kadhorou aake dēp thīn, kākā aake ye Wēi Nhialic kadhorou.

⁶ Aya, thöök nhom tueŋ, ala ke dīt cīt baar ë wär cī looi macar dēp la bilbil. Ku thöök kəu tēn ku tēn, lääi kaŋuan la nyīn juēc kenhīm ku keköth aya aake tō thīn.

⁷ Län tuen acit köör, ku län ye kek rou acit muər
 ë wen, ku län ye kek diäk acit nhom raan, ku län ye
 kek nuan acit lienh tən pār nhial.

⁸ Keek ebēn ηek ë la wuök kadātem la nyin juēc
 keyiic ku kekōth ayeer. Aa waak ket aköl ku wēēr
 ëlä,

“Alεεc, alεεc, alεεc tēnē Bēny Nhialic Madhəl
 tō thīn emēn ku arēēr tēthεeryon, ku yen bī bēn.”

⁹ Lääi kanuan aa diēt ket tēnē raan cī nyuc thöōc
 nhom, pīr akölrīēc ebēn. Aa ket waak leec kek ye
 lən ril yen ku le diikdīt. Tē looi kek ye këya,

¹⁰ kəcdīt kathiārou ku nuan aa kenhiəl guöt piny
 raan cī nyuc ë thöōc nhom cök, ku dorkē raan pīr
 akölrīēc ebēn. Ku cuεtkē ajəmken piny ë thöōc
 nhom, ku luelkē,

¹¹ “Yin ala yic, buk yīn a door Bānyda Nhialic,
 ku gēmku yīn alεεc rin le yin riel ku diik.
 Rin yin aci kēriēc ebēn cak,
 ku rienku yen aci yin kēriēc ebēn cak ku pīrkē.”

5

Athöör ku Manh Amääl

¹ Ku tiēn athöör ke muk raan cī nyuc thöōc nhom
 ciinden cuēc. Athöör aci gōt yic ku yekōu aya, ku
 aci nuet thok theny kadhorou.

² Ku tiēn atuny Nhialic ril apeī, ke thiēc röldīt,
 “Yeŋa la yic bī thaany kuem athöör thok ku liep
 athöör yic?”

³ Ku acin raan pan Nhialic, nadē ke ye pinyhom
 ku piiny tiəp yic la riel bī athöör pet yic ku kueen.

⁴ Guo dhiau apēi rin cīn yen raan cī yök ke la cök bī looi këya.

⁵ Go raan tök kəcdīt lək ya, “Päl dhiëü! Tīŋ köör, raan kuat Juda wundīt Debit wäär ë bēnyŋaknhom yen acī jəŋrac tiaam, këya yen alëu ye bī theny kadhorou kuem ku pet athöör yic.”

⁶ Ku tiēŋ Manh Amääl ë thən ke kääc ë thöny bēnyŋaknhom ciel yic. Yeen acī lääi pīr kaŋuan ku kəcdīt gööm piny. Ku Manh Amääl aca tiŋ ke ciēt cī nök. Ku ala tuŋ kadhorou ku nyīn kadhorou kek Wēi Nhialic kadhorou cī tuöc pinyŋhom ëbēn.

⁷ Go Manh Amääl la ku lööm athör tō ciin cuēc tēnē ye cī nyuc thöoc nhom.

⁸ Tēwēn cī yen ye lööm, ke lääi pīr kaŋuan ku kəcdīt kathiärou ku ŋuan, gut kenhiäl pinyenhom, ku kəcdīt aake muk thoom ku aduuk cī looi mīlšöŋ tōc cī thiäŋ adöŋ ŋīr, yen tō nyin röök kəc ë Nhialic luöü.

⁹ Ku ketkē waak ë yam ëlä,
 “Yīn ala yic ba athöör lööm ku kuem theny yethok.
 Rin cī kəc yī nök ku riemdu yen acī yīn kəc pinyŋhom,
 dhiēth ku wuöt ku thok ëbēn ɣəc bīk aa kəc ë
 Nhialic ëmēn.

¹⁰ Yīn acī keek cəl aaye kəc Nhialicda luöü.
 Ku aabī pinyŋhom mac.”

¹¹ Ku bēn daai, ku piēŋ röl atuuc nhial juēc apēidīt cīi kuen ke kääc ke cī thöoc gööm piny, ku lääi pīr kaŋuan ku kəcdīt,

¹² aake kēt waak röldīt apēi,

5:5 Cäk 49:9; Ith 11:1, 10 5:6 Ith 53:7; Dhäk 4:10 5:8 Wk 141:2

5:9 Wk 33:3; 98:1; Ith 42:10 5:10 B.bei 19:6; Ny 1:6 5:11 Dan

7:10

“Manh Amääl wäär cī nök yen ala yic.
 Adhil leec rin rielden tō kek yeen,
 ku jiεεk ku n̄iny kāŋ, ku diik, aa dhil athēēkdīt apei
 yök th̄n.”

¹³ Ku piεŋ kuat kē p̄ir ēbēn tō pan Nhialic ku
 pinynhom, ku piiny tiop yic ku wēr yiic ēbēn ke kēt
 ēlä,

“Tēnē yeen cī nyuc thōoc nhom ku tēnē Manh
 Amääl,
 bī alεεc ku athēēk ku diik ku riel aa kärke akōlriēec
 ēbēn!”

¹⁴ Ku gēm lääi p̄ir kaŋuan, “Yenakan.” Ku gut
 kōcdīt kenhiol piny ku dorkē.

6

Theny

¹ Guo Manh Amääl tiŋ ke kuem thaany tuen kam
 theny kadhorou, ku piεŋ län tōk kam lääi kaŋuan
 p̄ir ke lueel röldīt apei cīt mār ē deŋ, “Bäär!”

² Ku tiēŋ piny, go ya mathiäŋ yer yen tiēŋ, ku raan
 cath ē ye amuk dhaŋ ke wieth, ku gēm ajöm ē bēny
 bī tāau yenhom. Ku jiēl bī la pinynhom, cīt kēny cī
 tōŋ dhoŋ ku cop kōc ater.

³ Ku kuem Manh Amääl thaany ē rou thok, ku
 piεŋ län p̄ir ē rou ke jam röldīt ēlä, “Bäär!”

⁴ Ku bō mathiäŋ thith bei tēwēn. Ku raan cath ē
 yeen aci gām riel bī kōc cōl aathār pinynhom, ku bī
 kōc rōt nök ē rōt. Ku gēm paldīt ye kōc thōr.

⁵ Ku ben Manh Amääl thaany ē diäk kuem, ku
 piεŋ rōl ē diäk län p̄ir ke lueel, “Bäär!” Ku tiēŋ piny,

go ya mathiāŋ col yen tiēŋ ku raan cath ē ye amuk wēnh ye kāŋ them yecin.

⁶ Guo kē cīt rōl raan piŋ ke jam kam lāāi kaŋuan pīr yiic ku lueel, “Aduŋ abīk yen ariōp akāl tōk, ku aduuk kadiāk ayiēer kek ariōp akāl tōk. Ku duōkkē tiim ye miōk yōk thīn ku tiim ye cam rɛc.”

⁷ Ku ben Manh Amāäl thaany ē ŋuan kuem thok, ku piēŋ rōl lān ē ŋuan pīr ku lueel, “Bäär!”

⁸ Ku tiēŋ mathiāŋ cīn kit la gei, ku raan cath ē ye ala rin, “Thou,” Ku rin kōk cōl, “Piny ē Thou,” Ke buōth cōk ke cūi yiic mec. Keek aake cī gām riel bīk tēcīt aban ŋuan kōc pinynhom yiic nōk ē tōŋ ku cōk, ku tuaany, ku lāāi roor.

⁹ Ku ben Manh Amāäl thaany ē dhiēc kuem thok, ku tiēŋ wēi kōc wāär cī nōk ariāk cōk rin cī kek wēt Nhialic gam puōu ēbēn, ku yekē luɛɛl.

¹⁰ Go wēi kiu rōldīt apɛi ku luelkē, “Bēny yīn ala cōk ku yīn ē yic! Ye nēn bī yen rot jāl looi ba kōc pinynhom tēm awuōc rin cī kek ɣo nōk?”

¹¹ Go ŋek kamken aa gām alanh ɣer, ku lēk ke bīk tiīt tēthin-nyōot yet tē bī akuēn kōc lui ke ke, ku miēthakēn kek ke bī nōk ēbēn cīmēnden, jāl tuōōm.

¹² Ku tiēŋ Manh Amāäl ke kuem thaany ē dātem thok. Ku ya ayiēēkyiēēk pinydīt tet yen loi rot, ku loi akōl rot bī cuōl cīt alanh col, ku wel pɛɛi yenyin bī ya malual cīt riem.

¹³ Ku lööny kuɛl piny nhial cīmēn ŋam cī luōk ye yom tēŋ piny tē yiēēk yen tim.

¹⁴ Ku dol nhial rot ciēt ye athōor ku mēr, ku nyɛɛi kuōr ku golgol tō wīr rōt ē nyiēnken yiic.

6:5 Dhāk 6:2, 6 **6:8** Edhe 14:21 **6:12** Ny 11:13; 16:18; Ith 13:10; Juel 2:10, 31; 3:15; Mt 24:29; Mk 13:24-25; Lk 21:25 **6:13** Ith 34:4
6:14 Ny 16:20

15 Go bānyṇaknhīim ē pinynhom, ku bāny mēc, ku bāny apuruuk ku ajiεek, kəc thiek yiic ku aloony, ku kəc cie aloony them bik thiaan ē kuōr yiic, tēdē ke ye kuōr nhīim.

16 Ku yekē cōōt kuōr yiic ku aleel yiic, ku luelkē, “Aa wek kuōrkā kuōmkē ṽonhīim bī raan rēēr ē thōōc nhom ṽo cūi tīṇ. Ku Manh Amāäl acīi bī lēu bī ṽo bēn tēm awuōc.

17 Ee yic aköldīt bī Nhialic ku Manh Amāäl raan ēbēn tēm awuōc acī bēn, ku acīn raan bī awuōc kēnē göök?”

7

Kəc 144,000 Itharel

1 Ku bēn atuuc nhial kaṇuan tīṇ ke kääc guōk ē piny kaṇuan yiic, ke ke jác yom ē bēn guōk kaṇuan yiic nhom, bī cīēn yom ben buək ē pinynhom, tēdē wēr yiic, tēdē kuat tim nhom.

2 Ku tiēṇ atuny dēt ke bō bei tē ye aköl nyin bēn thīn, ke muk thaany Nhialic pīr, ku cəl atuny kēnē röldīt atuuc nhial kaṇuan wäär cī gām riel bik pinynhom agut cī wēr.

3 Ku lueel, “Duōkkē piny ku wēr ku tiim rēc, ṽet tē bī ṽok kəc cī Nhialic gam ēbēn yiēk nhīim kīt kenhīim tuēṇ.”

4 Ku lək raandā ṽen, lōn akuēn kəc la nhīim thaany ē Nhialic kəc Itharel yiic aa kəc 144,000 ē kuat thiäär ku rou Itharel yiic,

5-8 tim thiäär ku rou kuat Itharel tōk yic, Juda, Ruben, Gat, Acer, Naptali, Manathe, Thimaan, Lebī, Ithakar, Dhebulun, Jothep, ku Benjamin.

Kəc juēc kääc pan Nhialic

⁹ Ku diēl yanyin piny, ke ya tiŋ kəc juēc cī lēu bī ke kueen. Keek akuut kam kuat dhiēth, ku wuōt, ku thok kəc rēer pinyinhom ēbēn. Ku keek aake kääc ē thōoc nhom tuenŋ ku jəl a Manh Amääl, ku aake cienŋ alēth yer ku keek ēbēn aake muk wuōk agēp kecin.

¹⁰ Ku kiiukē röldit apēi ku luelkē,
“Nhialicdan rēer thōoc nhom ku Manh Amääl kek aa yook luōk.”

¹¹ Ku atuuc ēbēn aake kääc ke cī thōoc, ku kəcdit, ku jəl aa läai pīr kaŋuan gööm, ku gutkē kenhiəl piny ē thōoc nhom tuenŋ ku dorkē Nhialic,

¹² ku luelkē,
“Yenakan! Bī alεεc, ku diik, ku ŋjiny kəŋ ku gam riēl, ku athēk, ku riēldit apēi ku lεc aa kək Nhialicda akölriēēc ēbēn. Yenakan.”

¹³ Go raan tōk kam kəcdit wēn ya thiēec ku lueel,
“Ye yīŋa kəc cienŋ alēth yerkā, ku bik tēnēn?”

¹⁴ Guə dhuk nhom, “Aa kuōc ke, bēny. Ee yīn aŋic ke.” Go lueel, “Kekkā aa kəc cī tēek kārīl yiic ku guumkē. Aacā alāthken lək riēm Manh Amääl bī ke looi bik yer.

¹⁵ Ku ē yen aye kek kōoc thōny Nhialic nhom ku yekē luōi aköl ku wēer luanŋde, ku yen cī nyuc ē thōoc nhom abī ke aa kony ē rēerde thīn.

¹⁶ Keek aaciī rou ku cək bī bēn nək acīn, tēdē ke ya aköl tuc yen ben ke nyop gup,

17 rin Manh Amääl yen rëër thööc yic ciël abī ya abiōnden. Ku abī ke la dëëk nyin pīu ë pīr, ku aabi Nhialic weec nyin ë pīu wäär dhiεεu kek.”

8

Thaany ë dhorou

1 Nawën ηany Manh Amääl thaany ë dhorou thok, kam wën ke piny la bit tēthin-nyoot koor.

2 Ku tiēη atuuc kadhorou ke kääc Nhialic nhom ku ηek ke cī yiëk kaη.

3 Ku bö atuny dēt, ku këëc ariäk lööm ke muk kë ye adōη ηīr took thīn cī looi mīlāη tōc. Ku yeen ëcī gām adōk juëc ηīr apēi, bī ke juaar kek rōök kōc ë Nhialic ariäk cī looi mīlāη tōc nhom, rëër ë thööc lööm.

4 Ku la tol adōη ηīr cī took nhial, kek rōök kōc ë Nhialic muk atuny nhial kääc Nhialic nhom.

5 Go atuny kë ye adök took thīn lööm, ku muooc yic many rëër ariäk nhom ku cuet piny. Ku piη kë cīt mār ë den ku bir, ku loi ayiëëkyiëëk rot.

Kēη

6 Go atuuc kadhorou la kēη kadhorou röt guir bīk ke kooth.

7 Go atuny tuēη kaηde kooth yic, go ya gāi ku many cī liäap kek riem kek lööny pinynhom. Go mac tööη ë diäk tiim ku wal cī cil pinynhom nyop.

8 Go atuny ë rou kaηde kooth yic, go ya këdiit cīt kuur ë mac yen piir rot adëkdiëet yic. Go tööη ë diäk rot waar bī ya riem.

7:17 Wk 23:1; Edhe 34:23; Wk 23:2; Ith 49:10; 25:8 **8:3** Amo 9:1; B.bei 30:1, 3 **8:5** Leb 16:12; Edhe 10:2; B.bei 19:16; Ny 11:19; 16:18
8:7 B.bei 9:23-25; Edhe 38:22

9 Go tööŋ ē diäk kāk pīr adēkdīēet thou, ku rēc tööŋ ē diäk riēth.

10 Ku koth atuny ē diäk kaŋde. Go ya kueldit apei dēp yen lööny tööŋ ē diäk wēr ku nyīn pīu ye dek yiic.

11 Ku rin ē kuel kēnē acōl kēkec γαρ. Go pīu rōt wel bīk kēc, ku kōc juēc ke cī dek thīn aaci bēn thou rin cī pīu kēc.

12 Go atuny ē ŋuan kaŋde kooth. Go tööŋ ē diäk akōl ku pēci ku kuel rac abī tööŋ ē diäk ruelden yic liu. Ku cīn ruel tööŋ ē diäk akōl ku wēēr.

13 Ku jal jat γanyin, ke ye acu yen tiēŋ ke pār nhial, ku piēŋ ke cōt rōldit apei ku lueel, “Ye kēreec ē dā! Ye kēreec ē dā tēnē kōc ē pinynhom rin aabi käreec yök, tē le atuuc kāk kadiäk kēŋ kooth yiic.”

9

1 Ku koth atuny ē dhiēc kaŋde. Guō kuel cī lööny ē pinynhom tīŋ, ku yeen aci gām wēnh ē riēt bī yen tēthuth mec yic apei ŋaany nhom.

2 Go tēthuth mec yic apei ŋaany nhom. Go toldit apei bēn bei tēthuth, tol cīt tol manydit dēp apei, ku pat tol akōl nyin ku nhial ku looi piny bī cuōl.

3 Ku ye kōryōm yen bō bei tol yic bī la pinynhom, ku gēm riel cīt riel ē kith.

4 Go lēk ke bīk wal kek tiim ku kākōk cil pinynhom cīi rēc, ku ye kōc cīn gup kīn Nhialic kenhūim tuēŋ kepēc kek rēckē ke.

⁵ Keek aake cī Nhialic puəl bīk kəc aa yiək tērem apɛi tēn pɛi kadhiēc ku cīk kəc nāk. Ku arɛem yekē yiək kəc acit arem dhie cī kieth raan moc.

⁶ Ye pɛikā kadhiēc yiic abīk wīc bīk thou, ku thuɔɔu abī mɛc ke ke.

⁷ Kəryəm juëckā aake cīt mīthiöŋ cī guiir bīk la təŋ yic. Ku aake ceŋ kacit ajəm cī looi mīlāŋ təc kenhūim, ku aake cīt nyin kəc.

⁸ Ku nhim tō kenhūim aa bār cīmən nhim ē diäär, ku aala thook lec cīt lec ē köör.

⁹ Ku aala pem kē cīt wēnh dhie ye kəc kepuəth gēəŋ təŋ yic. Ku duɔət ye wuökken looi tē pɛər kek, acit duɔət riēth dhie ye mīthiöŋ juēc thel looi, tē le kek təŋ yic.

¹⁰ Ku yälken aa cīt yäl ē kith, ku kē cīt kek yäl käckä yen ale kek riel bīk kəc ya gäm tē rem ye pɛikā kadhiēc yiic.

¹¹ Ku keek aala bēnyŋaknhom mac ke, yen atuny tēthuth mec yic, ku riənke acəl riääk, tēdē ka cəl raan ē kəŋ rac.

¹² Kərəec tuenŋ acī thök. Ku ye cök ciēen kərəc kək karou thiek apɛi aabö.

¹³ Ku koth atuny ē dätəm kaŋde, guɔ röl piŋ ke bö kam guök kaŋuan yiic ariäk cī looi mīlāŋ təc kääc ē Nhialic nhom.

¹⁴ Ku lueel röl tēnē atuny ē dätəm wēn muk kaŋ yecin əlä, “Lony atuuc kaŋuan wäär cī duɔət piny wärdit Yuparet yic.”

¹⁵ Go atuny ē dätəm atuuckä kaŋuan jal lony bīk tööŋ ē diäk ē kəc pinynhom nök. Aake cī Nhialic täu aköldeen alanden.

16 Go lēk ɣen lən apuruuk aa timent buət karou.

17 Ku tiēŋ mīthiōōŋ ku kəc cath ē ke nyuōth yic. Ku kəcķā aala pem kəcit wēnh dhie ye kəc kepuōth gēēŋ təŋ yic, ku wēthķā aa thith cīmēn mac, ku aa mīŋōk ku mīkēth aya. Ku nhīim mīthiōōŋ aa thōŋ ke nhīim kōr. Ku mac ku tol ku kədēt mac cəl adēp ē bēn bei kethook.

18 Kākkā kadiāk, tol, ku mac ku ban mac cəl adēp bēn bei mīthiōōŋ thook, acī tōōŋ ē diāk kəc pinynhom bēn nōk.

19 Rin riēl mīthiōōŋ atō kethook ku keyāl aya, rin yālken aake cīt kāpieny kenhīim ye kek kəc gām yōntōök.

20 Abēk kəc ē pinynhom kēc kājuēc rēc kəc nōkkā ke nōk, aake kēc luoi kārēc puōl acīn, luoi ye kek jakrēc door, jak cī kiēēt ē wēth ku aleel ku tiim cie daai, ku cīk ye piŋ ku cīk ye cath.

21 Kəcķā aakēc luoi kārēc puōl, cīt nāäk ē rōt, luoi kāk jakrēc, ku luoi ē bal, wīny diäär ku cuēer.

10

Atuuc ē Nhialic ku athör koor

1 Ku bēn atuny dēt ril apeī tīŋ ke bō bei pan Nhialic ke bō ē pinynhom. Ee cī luāt kum ku mīit yenhom nhial, ku adēp nyin cīmēn akōl, ku dierke kecīt liem ē mac.

2 Atuny kēnē amuk athör thiin koor ŋaany yic yecin, ku cökden cuēc ēcī tāau adēkdiēet nhom, ku cökden ē cam pinynhom,

3 ku cōöt rōdīt cīt dhiēn kōör. Nawēn cī cōöt ke kecīt mār ē deŋ gam yerōl arak dhorou nhial.

4 Wēn jεεm kacit mār den kadhorou, ku wēn duēr kāk cik lueel gāt piny, ke ya piŋ rōl pan Nhialic ke lueel, “Duk kāk cī kacit mār den kadhorou lueel lēk kɔc kɔk, ku duk ke gēt piny.”

5 Go atuny wäär ca tiŋ ke kääc adēkdiεεt nhom ku pinynhom ayeer, ciinden cuēc jat nhial.

6 Ku kuēēŋ rin Nhialic cie thou, ku yen cī nhial ku piny ku wēr, ku kāk tō keyiic ēbēn cak ku lueel, “Nhialic acīi bī tūit apēi ēmēn, bī kē cī guir cīi loi tēcīt tē bī yen rot luōōi thīn!

7 Ku tē le atuny ē dhorou kaŋde kooth, ke Nhialic abī kēden cī thiaan thääp cimēn wäär cī yen ye lēk aluōōnyke, kɔc kākke tiŋ.”

8 Go rōl wēn ca piŋ ke jam nhial yēn yōök, “Lōor lōm athōr koor ŋaany yic muk atuny kääc adēkdiεεt nhom ku pinynhom ayeer.”

9 Guō la tēnē atuny nhial ku thiēc bā gām athōōr. Go gām yēn ku lueel, “Lōm ku cam. Abī miēt yīthok ciēt ye kiēc ku abī rot la wel bī wac yīyāc.”

10 Guō athōōr lōōm ku cam, go miēt yathok ciēt ye kiēc. Nawēn yet yāyāc ke wel rot bī wac bī ciēt cuεεi.

11 Ku lēk ya ēlä, “Yīn adhīl kē cī Nhialic guir tēnē kɔc ē pinynhom ēbēn nyuōōth ēmēn, kɔc jam ē thok juāac ku bānyaknhīim.”

11

Kɔc wēt Nhialic lēk kɔc

1 Go yēn gām wai, wai ē duēr ciēt tim dhie ye kāŋ them, ku lēk ya, “Lōor them luāŋ Nhialic ku ariäk tō thīn, ku kuen kɔc ē rōök thīn tēnē ya.

² Ku duk kal yic tō luak kōu them rin ləŋ kēnē acī gām kəc kəc wētđiē gam. Ku keek aabī gendiē kuany kōu ke rəc kəŋ pēi kathiārŋuan ku rou.

³ Ku ɣen abī kackiē karou tuəɔc bīk wēt ē yic la lueel. Aabā alēth col, alēth ē lɛɛŋ cien, ku aabī wētđiē la lək kəc ē nīn tim ku buət karou ku thiärdätēm yiic.”

⁴ Kəckä karou wēt Nhialic nyuəɔth, kek aa tiim karou ye miēthken looi ē miök, ku kək ye məc adök karou took kenhūim ē kōɔc Nhialic nhom bēny pinynhom.

⁵ Na le raan them ye bī kəckä karou yiək tērem, ke mac abō bei kethook ku nyuəp kəc ater ebēn. Kēya raan wīc ye bī looi kēya abī Nhialic nək.

⁶ Aacī Nhialic gām riel bī kek deŋ pēen bī cīi tueny nīn bī kek wētde nyuəɔth. Aacī gām riel aya bī kek piū waar bīk aa riem, ku cəlkē kuat kērac ebēn abō pinynhom. Kēnē alēukē bīk aa looi akōlaköl təcīt tē wīckē ye.

⁷ Nawēn cī kəckä karou wēt jal nyuəɔth ebēn, ke lān roor rac apɛi bō bei tēthuth mec yic, aabī thōr ke ke ku aabī lān ke nək,

⁸ ku guäpken aabī cuat ē gək yic gendīt wäär cī kek bēny ē kəckä karou piäät thīn tim cī rīiu kōu. Gen kēnē acīk gām rin cīt rin pan Thodom ku Ijip.

⁹ Kuat dhiēth, wuət ku thok pinynhom ebēn aabī guäpken aa tīŋ piiny ē gək yic nīn kadiäk ku abak, ku acīn raan bī puəl bī ke thiök.

¹⁰ Kəc pinynhom ebēn aabī puəth miət rin cī ē kəckä karou thou. Aabī yai looi ku gēmķē röt

11:2 Lk 21:24 **11:4** Dhäk 4:3, 11-14 **11:6** 1Bŋ 17:1; B.bei 7:17-19; 1Tha 4:8 **11:7** Dan 7:7, 21; Ny 13:5-7; 17:8 **11:8** Ith 1:9-10

kāpath kamken, rin cī kǎckā karou kǎc pinynhom cǎl agum apei.

¹¹ Tēwēn cī nīn kadiäk ku abak thök, ke Wēi Nhialic la ē kǎc wēn cī thou gup ku jǎtkē röt. Go kǎc ŋic ke cī ke tīŋ rišöc apei dīt.

¹² Ku piŋ kǎckā karou röl ke cöt pan Nhialic, “Bäk tēn.” Gokē la nhial ke kǎc aterken daai, ke ke cath ē piööl yic.

¹³ Kaam wēn cök ka ayiëkyiëk dīt tet loi rot. Go tööŋ ē thiäär ē γεu wīik, ku thou raan tiim kadhorou. Ku jǎl kǎc cī pīr rišöc ku leckē dīt Nhialic tǎ nhial.

¹⁴ Kēnē, yen ē thök kērεεc ye kek rou, kērεεc dēt ye kek diäk abö emēn!

Kaŋ ē Dhorou

¹⁵ Go atuny ē dhorou kaŋde kooth yic, guǎ atuuc nhial piŋ röt ke jam röldīt pan Nhialic ku luelkē, “Nhialicda ku Raan cī dǎc ku lǎc aaci bääny pinynhom ya kēden, ku Nhialic abi mac akölrīēc ebēn.”

¹⁶ Go kǎcdīt kathiārou ku ŋuan cī nyuc ē thöny Nhialic lööm wīik ke gut kenhiol piny, ku dorkē Nhialic,

¹⁷ ku luelkē, “Bēny Nhialic Madhǎl yen rēēr thīn thēer ku yen tǎ thīn emēn.

Yīn yeku leec rin cī yīn rieldu nyuöth yook ku yīn aci määcdu jǎck cök!

¹⁸ Ku kǎc kuc yīn aake cī puöth riääk rin tēn riäŋ ē piändu aci bēn tē bī kǎc cī thou yäth luk yic,

ku tē bī kəc ariöpdēn yök yīn luööi,
ku kəc kək Nhialic tiŋ, ku kacku ebēn kəc yī door,
kəckor ku kəcdit ebēn aaci bēn.

Tē bī kəc cī pinynhom rac nök aci bēn.”

¹⁹ Go luanj Nhialic nhial ŋaany thok, ku röŋdit löŋ ē döör ē tō aləŋthin. Go kək cīt bir ē deŋ ku ayiëkyiëëk, ku mär ē deŋ ku tuəny ē gēi, röt looi.

12

Tik ku kēdiit cīt jakanuaan

¹ Ku loi kēdiit kəc göi rot nhial. Tik ē tō thin ke cī aköl gööm piny ku pəei yecök, ku cienj ajöm la kəu kuəl kathiäär ku rou.

² Yeen ē tiŋ liac, nawēn cī thiök ke dhiēth, ke röp ku rem abī dhiau apēi.

³ Ku ben dēt bēn bei nhial kēdiit kəc göi, ku kēdiit thith cīt jakanuaan la nhīm kadhorou ku tuŋ kathiäär ku ajöm kadhorou kenhīm.

⁴ Ku thēl tööŋ ē diäk kuəl bei nhial yeyəl ku piir ke pinynhom, ku bīi ku kēc tiŋ wēn dhiēth nhom bī manh dhiēth tiit bī dhiēeth bī cam.

⁵ Go tik manh ē moc dhiēeth, yen bī kəc pinynhom mac ke cīn aŋuän. Go atuny nhial bēn ku rum meth man cin ku yēth nhial tēnē Nhialic thönyde nhom.

⁶ Go tik riŋ roor tē cīi ceŋ, tē cī Nhialic guiir tēnē ye bī yen la rēer thin, bī la muk ē nīn tim ku buot karou ku thiärdätem.

⁷ Go təŋ rot looi pan Nhialic. Atuny cəl Maikel ku atuuc kək aaci bēn thör kek kēdiit wēn cīt jakanuaan ku atuöcke.

11:18 Wk 2:5; 110:5; 115:13 **11:19** Ny 8:5; 16:18, 21 **12:3** Dan 7:7 **12:4** Dan 8:10 **12:5** Ith 66:7; Wk 2:9 **12:7** Dan 10:13, 21; 12:1; Jut 9

⁸ Ku kēdiit kēnē aci bēn tiaam, ku aci bēn cuōp wei pan Nhialic.

⁹ Maikel kek atuōōcke aaci kēdiit kēnē kek atuōōcke bēn cuōp wei pan Nhialic. Kēnē yen ē Bēny jakrεc diit wäär ye lueel ka cōl kēpiiny, yen raan ēbēn cōl aloi awuōc. Acik bēn cuat pinynhom kek atuōōcke ēbēn.

¹⁰ Ku piεη rōldit ke cōt pan Nhialic ku lueel,

“Ēmēn, tē bi Nhialic kōc luōk aci bēn! Ēmēn, Nhialic aci riēlden yen bēnyηaknhom nyuōōth! Ēmēn, Raanden cī lōc ku dōoc aci riēlde nyuōōth! Rin raan wäär ē kōōc Nhialic nhom ku gōony miēthakua akōl ku wēēr, aci cuōp wei pan Nhialic.

¹¹ Miēthakua aaci jōηrac tiaam rin cī Manh Amāäl rot juaar bi nōk riēnkua ku rin cī kek wēt yic lēk raan ēbēn, ku keek aa kēc wēiken nhiaar bik riōōc ē thou.

¹² Week ēbēn, wek kōc rēēr pan ē Nhialic miētke puōth, ku kuat kē rēēr ē pinynhom ku wār abī gum apēi diit. Rin jōηrac aci cuōp ē pinynhom tēnē ke, ku yen aciit puōu mac rin aci nīn juēc cī pāl ye bi yen luui.”

¹³ Nawēn le kēdiit cīt jakanuaan ηic lōn cī ye cuat pinynhom, ke cop tiη wēn cī manh moc dhiēēth bi dōm.

¹⁴ Go tik gām wuōk cīt wuōk acu ku bi cōl apēēr tēden wäär roor tē cīi cien. Ku bi yen la tiit thīn run kadiäk ku abak, ku akēc jōηrac bēn lēu bi yiēk tētōk.

¹⁵ Ku ηōk kēpiiny piēu diit cīt aboor yethok rin bi tik mou.

16 Go tiəm pinynhom tik kony, rin cī yaardit apeī piny dai yic, ku wēt pū thīn γorγor.

17 Go kēdiit cīt jakanuaan puōu riāāk tēnē tik apeī ku le thōr kek mīthken kōk cī lōōŋ Nhialic theek, ku mukkē wēt yic cī Jethu nyuōth.

18 Ku la jōŋrac kōoc ē wār nhom.

13

Lääi karou

1 Ku tiēŋ lān roor rac apeī ke bō bei adēkdiet yic. Ku ala nhīm kadhorou ku tuŋ thiāār la nhīm ajōm kathiāār. Ku kenhīm ēbēn rin aaci gōt rin ē Nhialic tōn guōp.

2 Lān wēn ca tiŋ acit kuac, ku adit cōk kek riōōp bēer la kōth nhīm, ku acit thok kōōr. Acī kēdiit cīt jakanuaan gām rielde bī nyuc ē thōoc nhom cīt bēnyŋaknhom la ye cōk.

3 Nhuom tōk, nhīm ē lān kēnē ala yic piāār cīt piāār tētōk dīt apeī ku jōl dēm. Kōc ē pinynhom ēbēn aake cī gāi ē lān kēnē ku buōthkē.

4 Keek ēbēn aake ye jōŋrac door rin cī yen lēi gām riēl, keek aya aake ye lēi door, ku luelkē, “Acīn kēril cīt ē lān kēnē. Acīn raan lēu bī thōr kek ye.”

5 Go lēi puōl bī jal nhiam apeī, ku ye Nhialic lat. Go Nhialic pāl riēl kēnē tēnē pēi kathiārŋuan ku rou.

6 Ku jōl lēi jam ku lēēt Nhialic kek kōcken rēer nhial paande.

7 Acī Nhialic puōl bī thōr kek kōc Nhialic ku tiēm ke. Ku ēcī gām riēl kōc pinynhom nhīm ēbēn.

⁸ Kuat raan rēēr pinyhom ēbēn abī ye adoor, kɔc cīi ye bī ya door aa kɔc cī rienken gāt athör pīr yic, ke piny kēc guɔ cak. Athör kēnē ē kēn Manh Amääl wäär cī nök.

⁹ Na lakkē yīth, ke we pīŋ apath,

¹⁰ “Kuat kē cī Nhialic guiir bī rot luōi yī abī rot dhiel looi kēya. Raan bī mac, raan bī teem röl ē pal abī teem röl. Wēt kēnē ē lɔn bī kɔc cī gam dhiel gum ku rilke puōth gamden yic.”

¹¹ Ku tiēŋ län dēt ke bō bei piiny, ke la tuŋ karou cīt tuŋ jɔŋrac.

¹² Yeen alui riel cīt riel län tuēŋ ke ŋic län tuēŋ, ku theny kɔc ē pinyhom thīn bīk län tuēŋ aa door, län wäär cī tētök dēm yenhom.

¹³ Ku looi kākdit jāŋ gōi. Ee ye mac cɔl alööny piny nhial ke kɔc ēbēn daai ē ye.

¹⁴ Län ciēn kēnē acī puōl bī kākdit jāŋ gōi aa looi ke län tuēŋ daai thīn. Rin ē kakkā yen acī yen kɔc pinyhom wēŋ bīk la yecök. Acī bēn yōök bīk kēdāŋ buth bī kek län tuēŋ kiēt ku yekē door, län wäär cī nök ē pal ku ben pīr.

¹⁵ Län ciēn kēnē acī puōl bī wēi yāth kēwēn cī län tuēŋ kiēt yic, rin bī ya jam ku cɔl kɔc cīi ye ye door anāk.

¹⁶ Ku yōök län ciēn kɔc ēbēn, bēny ku kīc, ajak ku raan ŋōŋ, alony ku raan lääu nhom, bī raan ēbēn kīt tāäu kōŋden cuēc, tēdē ke tēēu yenhom tuēŋ.

¹⁷ Acīn raan cī puōl bī kēde yaac, tēdē ke yɔɔc ke cīn nhom kīt kek rin, tēdē ke ye akuēn rienke nyuɔth.

¹⁸ Yin adhīl kāŋ ŋic apath ba kēnē jāl deet yic. Raan la kē ŋic adhīl kēnē dōt yic, bī akuēn ē län

ɲic, rin akuēn akääc nyin rin ē raan, akuēn ē buot kadātem ku thiärdātem ku dātem.

14

Manh Amääl ku kacke

¹ Ku jəl lä diēl ɣa nyin piny, ke ye Manh Amääl yen tiēɲ ke kääc gət nom Jeruthalem, kek kacke tim buot ku thiärɲuan ku ɲuan cī rin Manh Amääl ku rin Wun gət kenhüim tuēɲ.

² Ku piēɲ röl nhial kecīt arööl ē püu kat apēi. Aye piɲ kecīt mär deɲ thiek apēi, tēdē ke ye thoom juēc gut.

³ Ku kääc kəc tim buot thiärɲuan ku ɲuan ē thöoc nom tuēɲ, ke ket waak yam lääi pür kaɲuan ku kəcđit nhüim. Waakkä acin raan lēu bī ke ket, aa keek kek kəc cī Nhialic lušk ē röt.

⁴ Keek aa kəc cī röt tiit cie wic ē diäär. Keek aa kəc la cök. Ee Manh Amääl yen aye kē buoθh cök kuat tē le yen thün. Kockä kek aaci lušk kam kəc ebēn, aa kəc ē Nhialic ku Manh Amääl, aa cit rap ē yam dhie ye juēr Nhialic.

⁵ Ku keek aa kēc lueth kaɲ lueel. Ku acin kēreec cik kaɲ looi.

Atuuc nhial kadiäk

⁶ Ku tiēɲ atuny dēt ke pār aliir yic nhial ke muk athör Wēt Puoθh Yam, wēt pür akölrüēc ebēn tēnē kuat dhiēθh ku wuot ku thok pinynhom ebēn.

⁷ Ku lueel röldit, “Thēkkē Nhialic ku lēckē rin diüt yen apēi. Rin nün aaci thök, nün bī yen kəc ē pinynhom ɣäθh ē luk yic. Duorkē rin yen aa cak nhial ku piny ku wērdit ku nyin ē püu.”

⁸ Ku buəθh atuny rou atuny tuenj cök, ke ye lueel ë röldit, “Gendit Babilon aci rac ëbën. Babilon ë ye kəc pinyñhom cəl adek muəñ kec apɛi, muəñ ke cəl aloi kək ë bal ci Nhialic bën rac puəu.”

⁹ Ku buəθh atuny ë diäk atuuc tuenj wën karou cök, ke ye lueel röldit, “Raan län kënë door kek këden ci kiëët, raan la kïn ë län kënë yenhom tuenj, tädë ke ye yecin.

¹⁰ Abi muəñ riänj puəu ë Nhialic dhiel dek, muəñ kënë ë kē ci Nhialic puək ë biny riänj piände yic. Kəcä aabi döp many bën bei kuur yic tuc apɛi, ka atuuc nhial ku Manh Amääl daai thïn.

¹¹ Many bi ke nyop kënë abi ke reem akölrüëc ëbën. Kəc ë lëi ku këden ci kiëët ku kuat raan la kïn ë rienke, aci bi kañ löñ acin aköl ku wëët.”

¹² Kënë wëtde yic ë lon bi kəc ë Nhialic kepuəθh dɛɛt, kəc lööñ ë Nhialic theek ku lek gam tēnē Jethu.

¹³ Ku piən röl nhial ke cöt ku lueel, “Dhil gät, kəc mit gup aa kəc thou ëmën rin ci kek wët Bëny gam.” Ku lueel Wëi Nhialic, “Ee yic Alanden! Keek aci bi bën gum athɛɛ. Käk cik looi aabi cath ke ke.”

Tëmtëm pinyñhom

¹⁴ Ku lä daai nhial, ke ye luäät yer yen tiən ku këcīt Manh raan ke ci nyuc ë piööl ñhom, ku ala ñhom ajöm ci looi milänj təc, ku amuk pal moth thok yecin.

¹⁵ Ku bö atuny dët bei luanj Nhialic ku jiëem röldit tēnē raan ci nyuc ë piööl ñhom, “Jök luəi cök ye pal kënë, kək tem pinyñhom aaci luək, ku akölden bi ke tem aci bën.”

16 Go raan wēn cī nyuc ē piööl nhom palde met yic ku ler luōide yic, ku këya, këriēc ēbēn pinynhom aci tem.

17 Ku tiēŋ atuny dēt ke bö bei nhial luanŋ Nhialic ke muk palden moth aya.

18 Ku bö atuny wēn muk riel ē mac bei ariäk lööm. Ku cōal atuny wēn muk pal moth röldīt ku lueel, “Löm paldu ku tem abiēc dom yic pinynhom rin abiēc aci luək.”

19 Ku jəl atuuc palde met yic ku jəl abiēc tēm piny, ku kuut keyiic ku yēth ke tē bī ke la nhiaç yiic thīn, rin riāŋdīt puōu Nhialic.

20 Abiēc ēcī nhiaç γευ kōu ayeer, go ya riem yen loi kuēer, abi riem löl bār kōu apeī ku thuuth yic looi.

15

Kädīt rεc bī atuuc nhial bēēi

1 Ku tiēŋ kädīt dēt kεc göi nhial. Kēnē, aake ya atuuc kadhorou la riel bik käreç apeī kadhorou gām kεc, ke ye kek awuōc ciēn bī Nhialic tēm kεc rεc, rin kek aabi riāŋ ē piānde jāl thök.

2 Ku tiēŋ këcīt adēkdiεt le pīu nyīn kīr thīn cī liäap kek këcīt mac. Ku tiēŋ kεc wäär cī lēi kek kīnden cī ye kiēt tīam aya, agut lān wäär ye rienke njic akuēn. Keek aake kääc adēkdiεt le pīu nyīn kīr yōu ke muk thom cī Nhialic gām ke,

3 ku ketkē waak Mothith alony ē Nhialic, ku waak Manh Amääl elä,
 “Yīn Nhialic, yīn aril acīn kë thōŋ ke yīn,
 kāk ye looi aa path ku aa kεc göi!
 Ee yīn amac pinynhom ēbēn,

kuat kāk ye looi ēbēn aala cōk ku aa yith.

⁴Raan ēbēn abī rišōc ē yīn Bēny! Ku riēnku abī leec athεεr!

Ee yīn ē rot yīn Nhialic ē yic.

Kac ē pinynhom aabī ya bēn ku dorkē yīn.

Raan ēbēn acī tēpeth ye yīn luui thīn tīn.”

⁵Nawēn ē kēnē cōk, ke ya tīn luanj Nhialic ke ŋaany thok, kek duēl Nhialic nyuōth alōnthīn.

⁶Ku bō atuuc nhial kadhorou, wäär muk kädīt rεc apēi kadhorou bei luanj ē Nhialic. Keek ēbēn aake cieŋ alēth yer la diardiar, ku karkar cī looi milāŋ tōc aa cīk kaar kepuōth.

⁷Go lān tōk kam lāāi wäär pīr kaŋuan, atuōny tōk ya atuuckā gām aduj milāŋ tōc la yic awuōc thiek bō tēnē Nhialic pīr akōlriēc ēbēn, bī gām kac ē pinynhom.

⁸Duēl ē Nhialic ēcī tol paat yic piny, tol bō diik ku riēl Nhialic yic. Ku acīn raan lēu ye bī la thīn, yet tē bī kārεc dīt apēi kadhorou wäär muk atuuc nhial ku bīi ke pinynhom, kaŋ thōk.

16

Kārεc dīt apēi ciēēn kadhorou

¹Guō röldīt apēi piŋ ke cōt luanj pan Nhialic yic, ke ye lueel tēnē atuuc nhial kadhorou ēlä, “Lak pinynhom ku gamkē kädīt rεc ciēēnkā kadhorou, kārεc riāŋ puōu ē Nhialic.”

²Go atuny tuenj kērεc cī Nhialic lēk ye bī gām kac ē pinynhom gam. Go ya yōntōök rεc rem apēi kek

tul kəc la gup kīn lēi gup, ku kəc kēden cī kiēēt door aya.

³ Go atuny ē rou kēreec cī Nhialic gām ye bī gām kəc pinynhom gam. Go ya pīu adēkdīeet kek wel röt bīk ya riem, ku thou kāk pīr rēēr pīu yiic ēbēn.

⁴ Go atuny ē diäk käreec cī Nhialic gām ye bī gām kəc pinynhom gam. Go ya pīu wēr yīth ye dek kek wel röt bīk ya riem.

⁵ Guo atuny yen muk pīu pinynhom piŋ ke lēk Nhialic, “Yīn aci yic tēk kəc ē käreckā yiic, tēdu kan emēn ku tēthēer γon, ee yīn apath yītök rin le luōṅdu cök.

⁶ Kəc rəc wäär cī kacku ku kəc kākku tīŋ nök aaca gām riem bīk dek, yen kēpath ke ke.”

⁷ Ku piēŋ raan röl ke dhiau tēn ariäk ku lueel, “Ee tēde Bēny Nhialic Madhəl, käreec ca gam aa yīth ku aa la cök, luk aca ŋiēc looi!”

⁸ Go atuny ē ŋuan kēreec cī Nhialic gām ye bī gām kəc pinynhom gam. Go akəl tuöc apēi, ee cī Nhialic puəl bī kəc nyop atuöc.

⁹ Kəc aake cī atuny akəl nyop apēi abī ke gām gup γöntöök. Gokē Nhialic lat guöp, Nhialic yen bīi käreckā, ku cīk luoi käreec päl ku cīk Nhialic ye leec.

¹⁰ Ku gēm atuny ē dhiēc kēreec cī Nhialic gām ye ku ler ku tēū thōny län rac nhom. Go ya muöth yen kum kəc mēc lēi piny arēk abīk kethook aa kac rin arēm,

¹¹ ku yekē käreec apēi luēel ē Nhialic guöp rin arēm ku γöntöök rēēr kegup, ku cīk luoi käreec päl.

12 Go atuny ē dātem kēreεc muk gam, go ya wārdīt Yuparet yen döu, bī bānyṇaknhīim ləṇ ciēen puəl bīk tem kek apuruōōkken.

13 Ku tiēṇ wēi jakreεc kadiäk cīt aguek. Keek aake bö bei kēdīt cīt jakanuaan thok, ku lān rac thok, ku thoṇ lān wāär aya bö kek wēt ē lueth yen kōc wēṇ nyin.

14 Keek aa wēi jakreεc ē cath ke loi kāk kōc göi. Wēi jakreεckä kadiäk aa bāny pinynhom ēbēn kuōōt nhīim bī ke yāth təṇ yic. Təṇ kēnē ē təṇ bī rot looi luṇdīt bī Nhialic Madhəl luk looi tēnē kōc pinynhom ēbēn.

15 Aye Bēny lueel, “Piεṇkē! Ṽεn abō cīt ya ye cuār wakōu. Raan mit guōp ē raan ba yōk ke kēc nin, ciēṇ alāthke, rin bī cīi cath ke cīn alanh cien bī guōp yār tē tīṇ ye.”

16 Ku jəl wēi jakreεckä bānyṇaknhīim kuōōt nhīim tē ye kōc Itharel cōl, Amagedon.

17 Ku jəl atuny ē dhorou kēreεc muk päl aliir yic. Go Nhialic jam röldīt nhial ē thōōc nhom luanḍe ku lueel, “Kuat kēkith ēbēn acī luōoi tēcīt tēde.”

18 Ku bier deṇ apeī, ku mēēr ē mār thiek ku looi ayiēēkyiēēk rot abī kōc riōōc ēbēn. Acīn kēdīt cīt kēnē cī rot kaṇ looi tēnē cεk ke raan pinynhom, ayiēēkyiēēk rεc piny cīt kēnē.

19 Go gendīt Babilon yeyic tek ē diäk, ku wit ayiēēkyiēēk gεεth ē pinynhom juēc, ku kēya, ke Nhialic tēm gen Babilon awuōc thiek apeī rin riāṇ piānde.

20 Tēwēn le piny rot yāäk ke yōn thōny wūr mār, ku la gat dīr piny ēbēn.

21 Go gōidīt thiek apēi lōōny piny nhial ē kōc nhīim. Ku kēya, ke kōc lēēt Nhialic rin cī yen den cōl atueny gōi thiek apēi cī piny bēn rac.

17

Tiŋ rac adējōök

1 Go atuōny tōk atuuc wäär bö nhial kadhorou muk kārēc kadhorou bēn tēnē ya ku lueel ēlä, “Bäär ba yī nyuōth tē bī Nhialic ē tiŋ rēēc adējōök tēm awuōc thīn, yen tiŋ rēēr wēr yōth.*

2 Bānyŋaknhīim ē pinynhom aaci kārēc apēi, kāk ē bal looi kek ye, ku kōc ē pinynhom aake ye miānde dek bīk wiēt, ku tē cī kek wiēt ka jōl kārēc apēi kāk ē bal looi kek ye.”

3 Go Wēi Nhialic la yaguōp, ku nyiēēi atuny Nhialic ya ku yēth ya roor tē cīi cien. Ee tēēn ke ya tiŋ tiŋ cī nyuc lān thith kōu, lān la nhīim kadhorou ku tuŋ kathiäär cī guōp thiāŋ rin ē Nhialic lat guōp.

4 Tik a cien alanh thith ku alanh mathiāŋ. Ku aci mīlāŋ tōc ku kākōk la diardiar ku guēt dhēŋ thiāŋ yeguōp. Ku amuk aduŋ cī looi mīlāŋ tōc cī thiāŋ kāracken ē bal ye looi.

5 Ku yenhom tuēŋ aci rin gōt thīn rin cie deet yiic. Rin ye lueel ēlä, “EE YēN BABILONDīt, YēN Ē MAN DIÄÄR RēC ĒbēN, YēN AYE KÄRēC JÄL THĪN KÄRēC Ē PINYNHOM ĒbēN.”

6 Ku tiēŋ tiŋ wēn ke cī wiēt riēm ē kōc Nhialic wäär cī ke nōk, rin cī kek wēt Jethu gam.

16:20 Ny 6:14 16:21 B.bei 9:23; Ny 11:19 * 17:1 Wētde yic
gen Babilon. (Jer 51:13) 17:2 Ith 23:17; Jer 51:7 17:3 Ny 13:1
17:4 Jer 51:7

Ku wēn tīŋ ɣen ye, guo gāi apɛi.

⁷ Go atuny nhial ya thiëc, “Yenō cī gōi? Yin aba lək wētde yic yen kēnē, ku lān cieth yen la nhīim kadhorou ku tuŋ thiäär.

⁸ Lān yen ca tīŋ ěmēn aci kaŋ pīr thɛɛr, ku aciī ben pīr ěmēn rin abi bēn bei piiny tēthuth mec yic aköldā, ku abi jal la rōm ke riääk. Koc pīr ě pinynhom kēc Nhialic gāt athörde yic, athör ě pīr thɛɛr kēc piny cak, aabi gāi tē tīŋ kek ě lān kēnē. Aci kaŋ pīr, ku aciī ben pīr ya akölē, ku abi bēn dhuk pinynhom.”

⁹ Go atuny nhial lək ɣä, “Kēnē awic raan ŋic tak. Nhīim kadhorou aa rēer nyīn kuör kadhorou kek cī tik nyuc kenhīim.

¹⁰ Kek aa bānyŋaknhīim kadhorou aya. Bāny kadhiëc kamken aaci liu. Raan tōk aŋot ye bēnyŋaknhom ěmēn ku dēt aŋot kēc bēn, ku na le bēn ka bi rēer ě bāäny yic kam koor.

¹¹ Ku lān bi bēn bei tēthuth, yen abi ya bēnyŋaknhom ye kek bēt. Ku yen ě raan kam bānyŋaknhīim kadhorou, ku yeen abi rōm ke riääk.

¹² “Tuŋ kathiäär ye ke tīŋkā, aa rēer nyīn bānyŋaknhīim kathiäär kēc baai guo mac, ku aabi riel dhiel yök bik baai mac kek lēi kam thiin koor.

¹³ Wētden ě tōk, abik gam kedhie bik bāänyden thōn lēi.

¹⁴ Bānyŋaknhīim kathiäär ku lēi aabi keyiic mat ku thērke kek Manh Amääl. Ku keek aabi Manh Amääl kek kacke ke tiaam, rin Manh Amääl yen ě bēnydīt ě bāny, ku bānyŋaknhīim ku kacke kek aa

kɔc cī Nhialic kuany ku cɔɔl ke, ku kek aa kɔc cī wētde gam.”

¹⁵ Go atuuc lēk ya, “Pīu ye tīŋ cī tik nyuc kenhīim, aa rēēr nyin kɔc ē pinynhom ēbēn.

¹⁶ Lēi ku bānyŋaknhīim kathiäär ca tīŋ aabī kenhīim wēl adējōŋ kēnē. Abik dɔm ku thatkē ku retkē kōu, ku pālkē ke cīn kē cien. Aabī guāpde cuet. Abik rac ku yɔt aban cī dōŋ ē mac.

¹⁷ Bānyŋaknhīim kathiäärkā aabī ē kēnē looi, rin cī Nhialic ye tāau kepuōth bik bāānyden gām lēi, rin wic Nhialic ye kēya. Aabī läai theek yet tē bī kē wic Nhialic thök.”

¹⁸ Go atuny nhial lēk ya, “Tīŋ ca tīŋ kēnē ē gendit yen mac bāny pinynhom ēbēn.”

18

Nhialic aci Babilon rac

¹ Nawēn ē kēnē cök ke ya ben atuny nhial dēt tīŋ ke bō bei nhial pan Nhialic, ku atuny kēnē ala riēldit apēi. Ruēl dīit yeer wēn bō bei tēnē yen aci pinynhom ēbēn bēn looi bī yeɾ.

² Ku cōöt röldit apēi,
“Gendit Babilon aci riääk. Kɔc aaci kat thīn ēbēn. Acin raan cī dōŋ thīn, aa jakɾɛc ku diēt ɾɛc cīt awujoon.

³ Kärɛc ē bal ye looi gen Babilon aaci yen ke pinynhom ēbēn liääp,
bī bāny pinynhom keek aa looi kāk ē bal, ciēt ke cī muōn kec apēi dek.

Ku tēēn yen aci Nhialic rac puōu yeguōp.

Ku kəc ɛ pinynhom aake ye ɣəɔc thīn ku loikē kāreɔc
Nhialic rac puəu.”

⁴ Ku piɛŋ rōldēt ke jam nhial ku lueel,
“Kackiē jālkē geeu!

Ku bī week cīi mɛt awuöc looi keek yiic kā,
ku bī Nhialic we cīi yīk kädīt rɛc apɛi cīmēnden.

⁵ Awuöccken cik looi aaci juɛc nawēn
ke la nhial abik Nhialic dööt bik la rac puəu.
Go Nhialic awuöcckä yök ebēn, ku aaci bī kaŋ puəl
ke cīi tēm awuöc.

⁶ Dhiɛlkē luši kāreɔc cīt kāwäär cī kaŋ aa luši week.
Dhiɛlkē kāreɔc wäär cī looi cool kāk wār kāk wäär cī
kaŋ luši kəc kək.

Adhiɛlkē gām muön kec apɛi bī wiɛet cīt tēwäär ye
luši kəc kək.

⁷ Ee nhiam riɛlden dīt rēer ke yeen,
ku pirden rēer yen kāpath yiic.

Adhiɛlkē gām kē rem yeguöp thōŋ kek miɛt ɛ puəu
dīt rēer yen thīn.

Rin ye yen rot leec ɛlä,

‘Yɛn tiŋ dīit ŋaknhom mac paandiē ɛ riɛl cīn ke tem
ɣanhom,

ɣen acīn mony bī thou ku ba dhuur.’

⁸ Rin ye Babilon jiem kanhiaam këya,
ee kaam thiin koor ku abī Nhialic kädīt rɛc
apɛi cəl aabö tēnē yeen cīmēn tuaany, ku cəŋdīt apɛi
ku thuəu.

Abi yəət mac bī nyop ebēn, rin Bēny Nhialic yen bī
ye tēm awuöc,

ala riɛldīt apɛi.

9 “Bāny ē pinynhom wäär cī käreεc looi kek ye aabī dhiau ku löönykē puōth tēnē ye, tē tīŋ kek tol many cī ye yoot nhom tēmec.

10 Aabī kōōc tēmec, rin cī kek riōōc ciēt ke bī gām awuōc thiek cīt kēn cī gām Babilon, rin wäär cī kek käreεc looi aya kek ye. Abīk aa lueel,

‘Ye kērεεc ē dē, gendīt Babilon, gen ril yen cī guō riāāk ye kam thiin yic!’

11 “Kōc ē yōōc pinynhom aa dhiau rin Babilon, rin acīn raan bī kākken bēn lōk yōōc.

12 Mīlōōŋken tōc, ku alēth path, alēth cī looi mīlāŋ thith ku guēt path ku kāpuōth kōk cie lac yōk ku tunj aa kōn, ku kuōr path la diardiar, acīn raan bī keek bēn lōk yōōc tēnē ke.

13 Mīōk ŋjīr, määu ku abīik, ku yōk ku thōk, ku mīthiōōŋ ku lääi kōk baai ku tiim path ku aloony, acīn raan bī ke lōk yōōc.

14 Abī kōc yōōc aa lueel tēnē Babilon ēlā, ‘Kuat kāpath wäär ye ke cam, ku kāpuōth wäär ye ke cien aacī rac, ku aacī bī bēn yōk acīn.’

15 Kōc ē yōōc wäär cī jak rin ye kek kākken yōc ye aabī dhiau tē tīŋ kek ye ke dēp. Aabī ya kōōc tēmec rin wäär cī kek mat kek ye ciēt ke bī mat ē riāāk yic aya.

16 Abīk aa lueel,
‘Ye kērεεc ē dē tēnē gendīt cīt kēnē,
gen diīt dhēŋ cīt raan ceŋ mīlōōŋ tōc ku guēt path yeyeth!’

17 Rin kākka aacī guō bēn määŋ nyin yic.’

“Kɔc ɛ riāth geer adɛkdiɛt yiic, ku kɔc la kākken yekē keek la yaac riāth yiic, kāk ye kek pīr thīn aabī kōɔc tēmec,

18 ku dhiɛɛukē tē tīŋ kek tol nom ke dɛp geeu kek kāk tō thīn ɛbēn, ku jalkē ya lueel, ‘Makei! Acīn gendīt cī kaŋ cīɛt ɛ gen!’

19 Ku jalkē kenhūm pot ɛ ŋeth bīk nyuɔoth lɔn cī kek puōth löny ku dhiɛɛukē apeɪ ku luelkē, ‘Makei! Cī gendīt riāāk kēya?

Gendīt wäär ye kɔc la riāth jīɛk la yök thīn, yen cī guɔ riāāk ye kaam thiin yic kek kāk tō thīn ɛbēn!

20 Kɔc rɛɛr pan Nhialic miɛtkē puōth rin cī Nhialic Babilon rac.

Miɛtkē puōth kɔc ɛ Nhialic ku atuuc ɛ Raan cī lɔc ku dɔc,

ku kɔc kāk Nhialic tīŋ rin cī Nhialic Babilon tēm awuɔc tɛcīt tēn käreɔ wäär cī keek luōi week.’

21 Ku tiēŋ atuny Nhialic ril cī kuurdīt thiek kuany ku piir wūr adɛkdiɛt yic ke lueel,

“Kēnē yen ee tē bī gendīt Babilon rac thīn, ku acīi ben tīŋ acīn.

22 Yīn Babilon acīn läär bī bɛn piŋ yiic tēdu,

ku acīn kēet bī bɛn piŋ röt ke gut thom, tēdē ke ye kɛŋ kooth yiic.

Kɔckun atēet ɛbēn aabī mää,

ku wēthkun ye rap guur abī cīɛn rap ben guur thīn.

23 Ku mɛc acīi bī kaŋ bɛn tīŋ nyīn ke dɛp,

ku acīn ruɛi bī bɛn looi,

rin kɔckun ɛ ɔɔc kek aake ye kɔcdīt pinynhom,

18:18 Edhe 27:32 18:19 Edhe 27:30-34 18:20 L.rou 32:43; Jer 51:48 18:21 Jer 51:63-64; Edhe 26:21 18:22 Edhe 26:13; Ith 24:8

ē pinyinhom cam tēbäär ē ruēeny.”

²⁴ Nhialic aci Babilon tēm awuōc rin le yen guōp awuōc cī yen kōc kāk Nhialic tiŋ nōk, ku kōc juēc kōk ē Nhialic, Babilon ala guōp awuōc cī yen kōc juēc ē pinyinhom ēbēn nōk.

19

Riāŋ ē Babilon ē kōc Nhialic miēēt puōth

¹ Tēwēn cī atuny ril thōk ē jam, ke ya piŋ kōc rōt nhial ke loi kiεeu apēi ku luelkē,
“Lecku Nhialic! Nhialic yen aci ŋo luōk, diik ku riēl aa kāk Nhialicda kedhie.

² Luōŋde ee yiε ku ala cōk.

Yen aci tiŋ adējōōk wäär ŋiε tēm awuōc thōŋ kek kāk cī luōi kōc ē pinyinhom.

Babilon cī pinyinhom rac, rin rim kōc Nhialic atō yecin.”

³ Ku ben thān awēn loi kiεeu yai cam,

“Lecku Nhialic!

Babilon abi dēp ku many nyop ye abi tol ya la nhial akōlriēēc ēbēn.”

⁴ Ku tiēŋ kōcdit kathiārou ku ŋuan, ku lāāi pīr kaŋuan ke gut kenhiōl piny ē Nhialic nhom ku dorkē ke cī nyuc thōnyde nhom,

“Yenakan, Lecku Nhialic!”

Yan thiēŋ Manh Amāäl

⁵ Ku piēŋ rōl ke cōt thōōc lōōm ku lueel,

“Wek aa dhil Nhialicda leec, week ēbēn, kōc ril ku kōc niōp, wek kōc thek yeen ēbēn ye door.”

⁶ Ku piēŋ kəc juēc ke loi kiεεu nhial apēi, ke loi arööl cīt arööl ē piū kat apēi, ku cīt mār deŋ ku luelkē,

“Lecku Nhialic! Rin Bānyda, Nhialic Madhəl ee Bēnyŋaknhom!

⁷ Jəlku puōth miēt ku lecku Nhialic, rin cī nīn thiēŋ Manh Amāäl thök, ku nyan thiak aci rot guir bī lor.

⁸ Acī Nhialic ruök alēth path cīn gup acuəl bī keek cieŋ.”

Alēth path aatō nyin kəpath ye raan luōi Nhialic.

⁹ Go atuuc lək ya, “Gāt wēlkä, kəc mit puōth aa kəc cī cəl ē yan thiēŋ Manh Amāäl yic.” Ku met thīn elä, “Wēlkä aa wēl ē yith bö tēnē Nhialic.”

¹⁰ Guō ŋanhiaal guōt piny yenhom ba door. Go lək ya, “Duk loi kēya! Ee Nhialic yen aya luōi cīmēn ye yīn ku miēthakun cī gam, kəc cī yic cī Jethu nyuōth, buōth yic. Ee Nhialic ē rot yen aye door.” Rin yic cī Jethu nyuōth yen ē kəc cəl agam wēt ē Nhialic.

Raan cath mathiäŋ yer

¹¹ Ku tiēŋ pan Nhialic ke ŋaany thok, go ya mathiäŋ yer yen tiēŋ thīn kek raan cath ē ye. Ee yen raan ē Nhialic luōi ē puōn yer, kuat kək ye looi ēbēn aaya yith, tē looi yen luk tēdē ke ye təŋ, ka la cök ēbēn.

¹² Yen adēp nyin cīmēn mac, ku acieŋ ajōm juēc yenhom. Acī gāt kōu rin, ku ē yen aŋic riēnke ē rot.

¹³ Ku acieŋ alanh bār yekōu cī kōu thiäŋ ē riem. Ku riēnke aa, “Wēt ē Nhialic.”

14 Abuɔth apuruuk Nhialic ke cienj alēth yer, ku aake cath mīthiɔɔŋ yer.

15 Ku pal moth ē bēn bei yethok bī yen kɔc ē pinynhom tōk. Abī kɔc pinynhom mac ke cīn aŋuān, aabi nhiaç yiic cīmēn mōn nhiēc bei athuāai yic, bīk riāŋ puɔu ē Nhialic yōk kegup.

16 Ku alanhde kɔu ku yeyām, rin aci gōt thīn ēlā, “BĒNYŊaknhom Ē BĀnyŊaknhīim, BĒNYDīt Ē BĀnyDīt ĒbĒn.”

17 Guɔ atuny nhial kääc akɔl nyin tīŋ, ke cɔl diet pār aliir yic ēbēn ku lueel rōldīt, “Bāk tēn, bāk bēn mīth miēthdīt ē thēi cī Nhialic guiir!

18 Bāk ŋuεtkē gup bānyŋaknhīim, kɔcdīt apuruuk, kɔcdīt ril, gup mīthiɔɔŋken ku kɔc cath ē ke, gup kɔc ēbēn, kɔc aloony ku kɔc cie aloony, kɔcdīt ku kɔc kor!”

19 Ku tiēŋ lēi ku bānyŋaknhīim ē pinynhom kek apuruɔɔkken, ke kuut kenhīim ēbēn bīk la thōr kek raan cath mathiāŋ ku apuruɔɔkke.

20 Go lēi dām, kek raan wēt lueth wēŋ yen kɔc nyin lueel, raan kāk kɔc gōi looi, bī kɔc la nhīim kīn lēi kenhīim tueŋ muōr rin kākken kā ku dorkē kēden cī kiēēt. Go keek ēbēn karou piεer manydīt tuc apei bēn bei kuur yic ke pār.

21 Ku nāk apuruɔɔkken ēbēn ē pal bēn bei raan cath mathiāŋ thok. Ku guāpken aaci diet bēn ŋuεet.

20

Ruɔn tiem tōk

19:15 Wk 2:9; Ith 63:3; Juel 3:13; Ny 14:20

19:18 Edhe 39:17-20

19:20 Ny 13:1-18

¹ Ku tiēŋ atuny nhial ke bö piny, ke muk wēnh ye tēthuth mec yic tuer thok, ku luŋ arək dīt thiek apēi.

² Ku dām atuny nhial kēdīt cīt jakanuaan, kēpiiny thēer yen jōŋrac dīt ē pinynhom, ku rek ē ruōōn tiēm tōk.

³ Ku piir tēthuth mec yic apēi, ku riit thīn ku thiōök thīn ē thaany. Ku abī rēēr ē tēēn ē ruōōn tiēm tōk. Ku kēya acīi bī lēu bī kōc pinynhom bēn tuōōr nyīn. Ku na la runkā thōk ke yeen abī pāl ayeer ē kaam koor.

⁴ Ku tiēŋ kōc ke cī nyuc ē thōc nhīim, ku tiēŋ wēi kōc wāär cī tēm rōt rin cī kek wēt Jethu Krītho ku yen wēt Nhialic gam. Kōckä aake näk ke rin kēc kek wēt lēi gam ku dorkē, ku aacīn gup kīn ē lēi kenhīim tueŋ ku kecin. Aacī bēn pīr ku nyuuckē ē thōc nhīim, rin cī Nhialic ke gām riēl bīk mac. Ku jōlkē mac kek Raan cī lōc ku dōc ē ruōōn tiēm tōk.

⁵ Na cī runkā thōk, ke kōc kōk cī thou, kōc cī gam ku kōc ē pinynhom aabī bēn pīr, ku ē yen jōn rot tueŋ bī gup kōc cī thou rōt jōt.

⁶ Ku Nhialic abī kōckä dōc, ku keek aabī ya kacke rin ye kek kōc cī kaŋ pīr, rin cī ke kaŋ jōt thou yic. Ku keek aacīi bī thou thon ē rou, ku aabī ya kōc Nhialic luōōi ku Jethu Krītho, ku aabī mac kek ye ke ye bāny ē tōk ruōōn tiēm tōk.

Jōŋrac acī tiaam

⁷ Tē le ruōōn tiēm tōk thōk, ke jōŋrac abī lony tēwāär cī ye mac thīn.

⁸ Ku abī bēn bēn ē pinynhom bī kōc kōk bēn wēēŋ nyīn, kōc cī thiēi ē bēēi pinynhom yiic cōl Gok ku

Magok. Aabī jəŋrac mat yiic ku ɣēth ke təŋ yic. Ku keek aa juēc ka cīt liēet agör.

⁹ Ku weerkē pinynhom ēbēn, ku goolkē gen nhiεεr Nhialic piny, gen rēer kacke thīn. Go Nhialic mac tuōc piny nhial bī ke nōk ēbēn.

¹⁰ Ku cuet jəŋrac wäär ke wēŋ manydīt tuc apēi bēn bei kuur yic, tēwäär cī lēi ku kəc tör lueth kan cuat thīn. Ku keek aabī reem aköl ku wēēr ē tēēn akölriēc ēbēn.

Luj thök ē piny

¹¹ Ku tiēŋ thönydīt ɣer apēi kek raan cī nyuc yenhom. Go piny ku nhial määŋ yenhom tuēŋ ku cīn raan ben ke tīŋ acīn.

¹² Ku tiēŋ kəc cī thou ēbēn kəcđīt ku kəckor ē pinynhom ēbēn ke kääc thöoc lōöm. Ku jəl athör ŋaany yiic, ku athör cī kāk cī kəc pinynhom looi gət thīn, ku jəl athör dēt yen athör pīr ŋaany yic aya. Ku kəc ēbēn aake ye tēm awuōc thōŋ kek kē cī ŋek looi pinynhom, cī gət rienke thook athöör yic.

¹³ Ku jəl kəc ke thou wīir bēn ku kēēckē Nhialic nhom luk yic, ku jəl kəc cī thou rēer guäpken piiny rēŋ yiic röt jət aya, ku kēēckē Nhialic nhom luk yic. Ku keek aaci bēn tēm awuōc thōŋ kek kāk ke cik looi pinynhom.

¹⁴ Go thou nhom guöp cuat manydīt dēp apēi yic. Manydīt dēp kēnē yen ē thon ē rou.

¹⁵ Kuat raan liu rienke athör ē pīr yic, aci cuat baau mac dēp kēnē yic.

21

Pinynhom ku nhial ē yam

¹ Ku jal pinyhom ku nhial ē yam tīŋ, rin cī piny ku nhial theεr mää, ku cīn wērdīt kāk ben rēer thīn.

² Ku tiēŋ gen Nhialic yen Jeruthalem ē yam, ke bō piny nhial pan Nhialic bī bēn pinyhom. Gen ē Nhialic acī guiir cīmēn nyan cī guiir bī gām moc.

³ Ku piēŋ raan ke cōt rōldīt apēi ē thōōc lōōm ku lueel, “Ēmēn pan Nhialic arēēr kek raan! Ku keek aabī ya kacke, ku Nhialic nhom guōp abī rēer ke ke ku abī ya Nhialicden.

⁴ Abī piū wεεc wei kenyīn. Ku acīn raan bī bēn thou acīn. Acīn raan bī puōu bēn riāāk ku dhiεεu, tēdē ke ben tērem yōk yeguōp cīmēn theεr, rin kāŋ aacī rōt waar.”

⁵ Ku lueel raan cī nyuc thōōc nhom ēlā, “Tiēŋkē! Kāŋ ēbēn aluōōi bīk aa yam!” Ku lueel aya ēlā tēnē ya, “Gāt kēnē, alēu ba gam yen kē luεel rin wēlkā aa yith.

⁶ “Kuat kākkih ēbēn ēcī luōōi tēcīt tēde. Ee ŷen jōk ē cōk ku ŷen thōk ē kāŋ. ŷen abī raan nēk rou gām piū dek, aba gām piū ē pīr, ku aba gām ye ē path.

⁷ Kuat raan cī tiam abī kākā yōk tēnē ya. Aba gām ē kākā ēbēn, ku ŷen abī ya Nhialic ku yēen abī ya manhdīē.

⁸ Ku kōc riōc, ku kōc cī gamden puōl ku kōc cā adumuōōm looi, kōc cī kōc nōk, kōc ē luui kārεc, kōc ē jōŋrac, kōc jakrεc door, ku kōc alueth, kōckā ēbēn aabī cuat manydīt tuc bēn bei kuur yic, ku yen ē thon ē rou.”

Jeruthalem ē yam

21:1 Ith 65:17; 66:22; 2Pit 3:13 **21:2** Ith 52:1; 61:10; Ny 3:12
21:3 Edhe 37:27; Leb 26:11, 12 **21:4** Ith 25:8; 35:10; 65:19 **21:6**
 Ith 55:1 **21:7** 2Tha 7:14; Wk 89:26-27

⁹ Go atuōny tōk kam atuuc kadhorou wäär muk kērac apēi ciēēn bēn ku cōl ya, “Bäär lokku ba yī la nyuōth nyan bī ya tiŋ Manh Amääl.”

¹⁰ Go Wēi Nhialic la yaŋuōp ku yēth atuuc ya ē kuurdit bār nhom. Ee tēēn ke nyuth ya Jeruthalem gen ē Nhialic ke bō piny nhial pan Nhialic.

¹¹ Ee dēp diardiar ke diik Nhialic. A dēp cīt kuur cī guan bī la lēŋlēŋ.

¹² Ku aci gōōl piny kal ril bār, ku ala thok kathiäär ku rou, ku thokkā ēbēn aaye atuuc kōōc thīn. Ku thokkā aaci rin kuat Itharel kathiäär ku rou gōt thīn.

¹³ Ku kal cī γεu gōōl piny ē la guōk kaŋuan, ku guōŋ tōk ē la thok kadiäk.

¹⁴ Kal cī ke γεu gōōl piny aaci buth aleeldit kathiäär ku rou nhīm. Ku rin atuuc Manh Amääl kathiäär ku rou aake cī gāt aleelkä kōōth.

¹⁵ Ku atuny wäär yen jam ke ya, amuk wai cī looi mīlāŋ tōc bī yen γεu athem, pänyde ku thuōkke.

¹⁶ Γeu ala guōk kaŋuan thōŋ thook. Ku them atuny nhial γεu waiden wēn muk, ku yōk ke cīt meel tiēm tōk ku buōt kadhiēc bēr ē kōu, ku lāau yic kek bēr la nhial ē cīt kēnē aya.

¹⁷ Ku them atuuc la nhial ē kal ku dīt ē kōude aya, ku yōk ke ye akāāth thiärdātem. Käk ke ye atuuc them aake cīt kāk ye kōc them ē path.

¹⁸ Päny cī γεu looi, aaci buth kuur yer dhēŋ ku γεu nhom ēcī looi mīlāŋ tōc la gei cīt macar.

¹⁹ Puōōny ē γεu aake cī jōk cōk kuat aleel la diardiar. Aleel ke cī puōōny jōk cōk aya aake yiic thiäär ku rou. Kōk aake thith, ku kōk aa yer ku

kök aa maṅök, kök aa mīthiöön, kök aa mīkēth, kök aa mīyēn, kök aa mīlööth, kök aa maliik, ku kök aa mamer.

²⁰ Ku kit ebēn aake ye thiäär ku rou.

²¹ Thok kathiäär ku rou ē genē aake cī looi aleel yer kathiäär ku rou, thuṅ tök ē ye looi alel yer tök, ku geēk ē γευ yic aaci looi mīlāj töc la diardiar cīt macar.

²² Υεν akēc luanṅ Nhialic ye kɔc röök thīn tīṅ, ee gen kēnē yic, rin Bēny Nhialic Madhəl ku Manh Amääl kek aa luanṅ Nhialic.

²³ Gen kēnē ecīi wīc ruel aköl, tēdē ke ye pæi, rin ala ruelde ē rot, rin rueldīt Nhialic yen aye ye mer yic, ku Manh Amääl yen aye ye mer yic cimēn many adök.

²⁴ Ku ruel ē gen yen aye kɔc cath thīn, ku bāny pinynhom aabi ya bēn bīk jaakden bēi thīn.

²⁵ Kal aabi ya rēer ke ṅaany thook aköl ku wēer, rin piny aci ben a cuəl.

²⁶ Kɔc wuöt ebēn aabi bēn ē gen yic rin bī kek Nhialic bēn aa door ku leckē.

²⁷ Acīn kɔc la gup adumuööm bī puöl bīk la geeu, ayī kɔc ē luui kāk kɔc cəl ayär gup ku kɔc tör lueth. Kɔc bī puöl bīk la geeu aa kɔc cī rienken gät athör ē pīr Manh Amääl yic.

22

¹ Ku ben atuny nhial ṅa nyuöth wär cī thiāj pīu ē pīr la kīrkīr apēi bö tēnē thōny Nhialic ku Manh Amääl,

² ke kuëer geeu gëk ciel yic. Agör ë wär ləŋ ku ləŋ, akëëc tim ë pīr thīn, tim luok ë pæi thok ëbēn ruōōn tōk yic, ku kəc wuōt ëbēn aa yiēthke lööm bī kek yōntōok aa cəl adem, ku tueny kək aya.

³ Acīn dēt mæen Nhialic bī rēer ye gen kēnē yic. Kəc Nhialic ku thōny Nhialic kek thōny Manh Amāal kek aa rēer thīn, ku kəc ë Nhialic kek aabī ye aa door.

⁴ Kəckā aabī Nhialic aa tīŋ ku rin Nhialic abī gāt kenhīim tuenŋ.

⁵ Abī ciēn cuəl ë piny ye gen yic. Kəc ë rēer thīn aacīi bī wīc ruəl akəl, tēdē ke ye many bī piny mer yen wīckē. Rin Nhialic yen abī ya ruelden. Aabī rēer thīn ke ye bāny akölriëc ëbēn.

Bēn ë Jethu

⁶ Go atuuc lək ɣa, “Kuat kək ca tīŋ ku piŋ ke aa yith ëbēn. Ku Bēny Nhialic yen Wēike ɣāth ë kəc kək Nhialic tīŋ gup, yen acā atuōnyde tuōōc bī kacke nyuōth kək bī rōt looi ye nīnkā.”

⁷ Aye Jethu lueel ëlä, “Dhielkē piŋ apath! ɣen abō emēn! Kəc mit puōth aa kəc thek kək cī lueel athör kēnē yic ëbēn!”

⁸ Ee ɣen Joon ɣen a ɣa piŋ ku tiēŋ kək kək. Tēwēn cī ɣen ke piŋ ku tiēŋ ke, ke ɣa gut ɣanhiəl piny yecök ku duōor atuny wēn nyuth ɣen kək kək.

⁹ Go jal lək ɣa, “Duk loi kēya! ɣen alony cīmēndu, ku miēthakui kəc kək Nhialic tīŋ, ku kəc ëbēn kək tō athör yic theek. Dor Nhialic!”

¹⁰ Ku lək ɣa, “Duk kək cī gāt athör kək Nhialic kēnē yic thian tēnē kəc, rin cī piny thiök ke thök.

¹¹ Ku kəc kərəc looi aabī ɲot ke la tuen ke looi kərəc, ku kəc cī wēt Jəɲrac gam aabī ɲot loikē kəya. Ku kəc ē luui kəpath aabī ya luui kəpath. Ku kəc Nhialic aabī la tuen ke luui Nhialic.”

¹² Aye Jethu lueel əlä, “Piɛɲkə apath ɣen abö emən thiin, ɣen abö ba kəc bən riəp, tēdē ke ɣa tēm kəc awuɔc thōɲ kek kē cī ɲek looi thɛɛr wäär.

¹³ Ee ɣen jök ē cök ku ɣen thök ē kəɲ.

¹⁴ “Kəc mit gup aa kəc cā aləthken lək riem Manh Amääl, rin aabī la yic bik mīth tim pīir cam, ku aala yic aya bik la gen Nhialic ē yam.

¹⁵ Kəc tō ɣeu kəu aa kəc pan mac, kəc cī kegup yiək acuəl rin theek kek jəɲrac, kəc nək ē kəc, ku kəc ē jam lueth, ku kəc luui kək bal aacīi kəɲ la ē gen kənē yic acin.

¹⁶ “Aye Jethu lueel əlä, ɣen acā atuɔnydiē tooc bi kəkə bən lək we, wek akuut cī gam. ɣen ē kuat dhiənh bənyaknhom Debit, ee ciēer bak piny ē ruəl bēi.”

¹⁷ Aye Wēi Nhialic ku kəc Nhialic kek cīt nyan thiak ē Manh Amääl lueel, “Bäk!” Ku kuat raan piɲ ē kənē adhil lueel aya, “Bäk!” Na le raan nək rou ke bö, kuat raan nək rou abī dek piū pīir ē path.

Thök ē wəl

¹⁸ ɣen Joon, ɣen alək kuat raan piɲ ē wēt kənē puɔu ebən, na le raan juək kēde thin ka bi Nhialic tuɔc kərəc cī gət athör kənē yic.

¹⁹ Ku na le raan nyɛi wēt tək kam wəl tō athör wəl cī nyuɔth ɣen yic, ke Nhialic abī yinyden bi tək

22:11 Dan 12:10 **22:12** Ith 40:10; 62:11; Wk 28:4; Jer 17:10

22:13 Ny 1:8, 17; 2:8; Ith 44:6; 48:12 **22:14** Cäk 2:9; 3:22 **22:16**

Ith 11:1, 10 **22:17** Ith 55:1

ye mīth tim ē pīir yic, ku la gen yam, cī ke gōt athōr
kēnē yic, nyaai tēnē ye.

²⁰ Ku Jethu raan lēk kōc kākā ēbēn aye lueel,
“Yēē-yēē! Yēn abō ēmēn!” Kēya, ee tēde. Bäär Bēny
Jethu!

²¹ Bī dhēēj Bēny Jethu rēer kek kōc ē Nhialic.
Yenakan.

Lëk yam
New Testament in Dinka, Southwestern (SU:dik:Dinka,
Southwestern)

copyright © 2006 Wycliffe Bible Translators, Inc.

Language: Dinka, Southwestern

Translation by: Wycliffe Bible Translators, Inc.

Dinka, Southwestern

dik

Sudan

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dinka, Southwestern

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files dated 29 Jan 2022

d94b9d26-33ff-5c4e-819f-5bfe86ac9e55